

兩浙輶軒續錄

兩浙輶軒續錄卷十八目

戴殿泗 龔麗正 陳光鑿 姚學煥 來宗敏

翁名濂 李 穀 張燕昌 袁 鈞 鄭 勳

陳鴻熙 潘 賢 陳春曉 江 鑑 徐恭儉

陳豫鍾 胡理垣 汪 玉 孫仁鼎 顧 均

車伯雅 康葉封 蔣 炯 屠紹理 錢 杜

關 炳 汪成毅 吳玉輝 沈毓蓀 羅 枚

王尙珏 殷樹柏 汪 雲 陳 祁 黃若濟

朱錦琮 胡元熙 胡金題 楊鳳苞 孫賡南

周 農 葉成英 胡 珏 吳存倫 張 烜

施搏九 周 開 陳熙臺 陳廣甯 陶際會

陳元驥 黃徵謀 呂 迪 宋經畬 應大成

曹開泰 姜典三 吳企顛 高 溥 童中模

呂 鴻

兩浙翰軒續錄卷十八

督學使者潘衍桐訂

戴殿泗字東珊浦江人嘉慶丙辰二甲一名進士官翰林院編修著風希堂詩集

陸繼輅序畧先生少工五言古體瀉悶似陸平原鑱刻似謝康樂長篇委帖排鼻出入杜韓大率皆精心鍛鍊

之通籍後格律稍自類放於東坡石湖諸家無意模倣往往得其天趣緣四十後深求治心復性之學與道

大適凡解悉屏偶寄於詩而非詩之所能盡矣

李培謙跋畧風希堂稿不媿韓杜大家私心最喜者山居歸田二集如射者之貫的精神與之俱至

戴聰跋畧乾隆庚子以前為諸生所作者為山居集是年以優行貢成均辛丑充入旗教習倪韭山高未圃倡

酬之作為東華集丙辰後與同館倡酬之作為翰苑集己巳假旋為歸田集庚戌入都館韓城相國家己未入

直上書房詩頗散失無存

述懷

力結謝耘耨不穡愧隴畝揮斤巧者誰顏汗觸傷手人生智

慧分藝習視所受塞職非偶然窮年竟何有窈窕山庭深空

濛古苔厚幽帷褰蘿蔓翠竹理戶牖迴寄非一端高情矚前
後經綸振古新要道垂蒼后薄德自三季情欲紛相糾頽風
知何極積習亦已狂被褐啟幽徑清修厲重阜沈深破垠塢
豁達望星斗有抱必瓊瑛於中懷刻鏤矜奇庶姱節亦足厭
惛惛坐此自兀兀斯意終難剖風吹幽獨心虛壑長藜莠山
禽習叫嘯野鼠散奔走鬱鬱灌木林百尋真獨壽粲粲凌茗
花纖屑亦有取挾冊哦其閒研悅不去口神奇世士驚糟粕
古人朽將懸呂覽金甘覆太元甌日力擲豈虛嚴程戒斯趣
側聞至人教敦朴風化首德意被士農歌聲洽矇眵拔擢或
幽冥文采爭刮垢森森廊廟具磊落參彝卣未信蓬蒿賤深
藏無與叩豕的白遼東馬背瘡隴右衣襟非百結卻立眴跟
肘通方性所歉密勿情所負努力望東皋樵采供薪樵緬想

先典型高風振林藪還思百年外寥落將安偶志業夫豈徒
衷懷聊且苟在己不外求思成期在久

嘉禾攬古四首

望盡平畦際碧天胥山一點小於拳江湖網落塗泥國周漢
雲爭叔季年地有連城供百戰人聞捨宅媚三禪古來興滅
知多少卻寄遙情煙雨邊

梵王舊宅金明寺千古猶傳范相家棹拂湖波長不返樓懸
妝鏡向誰誇門成磊石輕蒲羸井起神光映落伽十策至今
徵富國翩翩墳衍說桑麻

派接臨茗衆水趨清漣淦淦散濱湖星精騰處光凌斗地壤
開時賦入吳舊國稔知魚樂在高城遙識馬嘒無平樓極望
參瀛海霞氣滄茫映綠蕪

京師車輦錄金卷一
二
又七
鴛鴦湖色鏡紋平蕩槩菱歌曉夜清黛柏雲松偃王廟文絲
白紵女兒城橋名內相虹猶跨寺首金王象欲鳴盡日澄光
看不足伴誰煮茗淪雲英

貞女篇爲鍾吾高氏聘婦蔡作

山頭女貞木翠葉何離離下有不轉石上有孤鸞枝棲鸞瓊
樹陰修翼靜自葆知共長離飛不識鷦鷯好弱女出蔡族牽
絲託高門玉樓召何遽長斷閨中魂斷魂何所思惟守從一
義母也實天只精誠遂厥志素輿爲迎從羸經爲資妝明樽
爲杯香總几爲闈房茹荼荼益甘餐粢粢非苦堂上有尊章
怡顏奉肴醑弱弟漸成立幼婦權同居他年立佳嗣泉下慰
哲夫琨玉自言潔秋霜自言清孰知蔡貞女婦道克有成向
校天祿閣彤管義始燦試歌孤鸞吟用光列女傳

擬古

幽情不可羈汎濫追雲翔上攀瑤臺屺延頸眺八荒建木植
無影左右飄神光歛吸不暇瞬懷刻披瓊漿挹精而取華攬
置彼中堂相逢同心子神力鎮扶將握中斯有物指顧增傍
徨

形止神與馳靈蹤渺無息元空播雲雨儀軌胡由測枯槁山
林姿專志自藏匿詰朝儀鳳翔文采被五色世界本瀾翻大
道原繩直昭攝徑寸心洞照常默默抗懷彼姝子神理無能
卽

置酒臨高臺曠望嵯峨山親朋從我遊被服麗且嫺相將遊
帝里雙闕造雲閒斟酌北斗柄四氣爲循環感興軼往古幽
渺無由攀神墟奠九野遺蹤偉爛斑拊節一長嘯崑邱入戶

關無爲守塵躅庶用凌雲關

長林何煒煒高嶂亦嗟嗟陰陽所經互煙雨相盪摩不見桃李樹風暝春場花軒車蒙錦障雜沓綴綺羅巖幽抱節士當此亦來歌白日無私照高穹麗且和三春復九秋傾注如陂陲達人審至理俗士豔光華華實道安在沈吟心澹沲於焉雲咸奏奇響軼山阿

題觀潮圖

古今幾人晰潮理應月之說最得之天垂陰精水陰象缺圓翕闢同厥儀海鯨出入語斯誕種胥追逐事亦疑候因子午扶倪筦信挾朮望交春椎氣盈朔虛不失一是誰布算精羸畸金行太白氣特盛抱朴秋滅理未窺此如明暉隨皓月大造斡運無參差或言廣陵及津口扶胥黃木潮未奇之江雄

豪甲天下龕赭約束增危嶷斯談亦未臻理奧試探巨浸窮
端涯昆侖一山屹天柱四流四下歸溟池浮天載地四實一
起伏噓喻皆有期虞州禹迹據震位浙境所值真東維汪洋
大氣所噴薄正與漸水相蕩彌奇姿遂納萬渤解素車白馬
詞何卑我家上流三百里攀蓬狎浪如等夷定山漁浦實坦
道六和翠堵森如錐時登吳山攬怪猶桂香馥馥風披披願
探天根追月窟大觀藉作窮神資客投新圖起逸興定恢胸
宇吞瀛裨枚生已去謫仙遠倩誰鴻筆驅蚪螭

龔麗正

字賜谷號閩齋敬身子仁和人嘉慶丙辰進士官江南蘇松太道

杭郡詩三輯閩齋爲金壇段懋堂女夫獨得漢學之傳官祠部入直

樞垣旋典試廣西出守徽州調安慶擢蘇松太道權臬司

督理滬關所得盡瞻親族解組歸田散貂襦食處之晏如主講紫陽每勸諸生必曰先器識後文藝校課綦嚴論題輒數百字著有國語韋昭注疏

題鳳翔上人小影

絕好靈山古道場重開蓮社地清涼大師昔日揮毫處賸有
窗前竹幾行

梵村風景想依稀記得年時叩竹扉山自深深林自密素心
人到欲忘歸

蓮宗古社仗重興此地應教悟上乘難得高僧飛錫住東林
一脈有傳燈

陳光鑾

字金士號珊浦秀水人嘉慶丙辰進士官紹興教授善自怡集四卷蓬萊山館集二卷

石瀨山房詩話珊浦敦本勤學潔已擇交居越二十餘年非公事不輕謁上官及宰室惟負笈從游者恆滿齋舍稱為石簣先生

得家書知卜居已定感賦

迢遞鄉音望不賒卜居傳報小於蝸經秋老屋今誰主倚郭

低垣又我家沽酒弗離城北市讀書添種院西花十年心計

門前樹要看濃陰歲歲加

姚學埭

字晉堂號鏡塘歸安人嘉慶丙辰進士官兵部郎中著竹素齋集祀鄉賢

府志學埭居官恪勤鉅細不苟性剛干諷白首為郎意泊如也操行尤絕中外餽遺一無所受裘葛僅具嘗擬

奏疏兩册皆時事之大者待列諫垣上之惜不及也詩學眉山而謹古文如茅鈍叟而簡淨過之

冷廬雜識鏡塘官京師數十年寓破廟中不攜眷屬趨公之暇以文酒自娛嘗賦梅子詩云臭味偏於吾輩近

風懷莫遣女郎知一時推為絕唱其他佳句如謝人送榮云但使斯民無此色願教我輩味其根送閔貢甫之

揚州云養志未須嫌祿薄讀書大好是官閒皆清妍絕俗

緝雅堂詩話鏡塘先生居官端謹不履要津初尚書彭齡至兵部日問孰為姚鏡塘先生其素望如此部曹每

月有印結銀先生獨不受數十年來一人而已姚文僖公稱為聖門狷者其弟子徐莊愨公遂以忠節昌大其

學天下滔滔支柱世教不重賴斯人哉

王節母詩節母姓某氏德清人同邑王君聘為繼室未嫁而王君卒前妻有一子尚孩母往守節撫

孤成

夫蚤死妾安歸身既許人不往何為一解夫蚤死夫有子願往

撫之主夫祀二解夫有子兒無母不往撫之懼夫無後三解往撫

孤慰死夫辛勤三十年以有此室家四解兒有婦婦有子夫不

死五解兒有子夫有孫曰此王氏之門六解夫不死身可死表厥

閭為世軌節母之節孰與比吳羌巔清谿七解

李烈婦詩烈婦姓王氏李松軒明經繼室夫死自經

山頭朔風吹古雪寡鶴叫雲雲欲裂孤松不作半生桐貞媛

殉夫心似鐵盛年嫁得列仙儒草元未就亡童烏秋室書牀

甘寂寞忍教中道沈黃壚侍疾經年心力盡撫棺一慟血淚

枯豈不戀慈母豈不念君姑仰瞻失我儀俯視無遺雛波瀾

不起古井水夫生妾生死妾死手翦皮金作香字骨冷名芳

有如此莫言奇節異中行留取冰心照彤史

孫貞女詩

貞女武康人許字德清徐氏子未嫁而塔卒守志依伯兄以居今十有九年吳江費太史

蘭幄書其事武康沈孝廉寅亮為徵詩

富春有淑媛許為東海婦填橋鵲待期舞鏡鸞失偶一女子

已繫纓中道復從誰良人未授綬欲往又非宜二焚我羅襦

裳閉門矢靡忒生依伯兄居死葬父母側三弱齡志已決於

今十九年卓哉子卿操得自閩中賢四侍女亦不嫁相於慕

高節風烈昭管彤千春字不滅五

義烈丁又姑詩

夫死不獨生節烈古所紀身死夫乃生於古少倫比卓哉丁

又姑許字胡氏子結褵未及詠壻病入骨髓女聞誓身代留

書謝母氏仰籲蒼蒼天俯投清冷水貞魂乍宵沈痼疾忽晨

起端如縷續命絕勝枝連理讓木交枯榮桐根半生死植物
尙有情桃僵代者李何況天人閒應感機甚邇千載忠孝心
一誠而已矣

貞烈馮姑詩

姑蒼梧人儒家女許字羅氏子未嫁而婿死願往壻家守志不得遂自沈湘水以殉

李羅園孝廉爲徵詩

湘水雖云清不如貞烈名湘水雖云深不如貞烈心人生有
恨無終極灘水南流湘水北灘水旣分離湘水疇相依未嫁
所天隕此身當安歸願依壻家以死守上奉尊章下立後此
志不遂計靡它湘靈招我可奈何獨將香骨歸江波香骨干
秋葬魚腹淚痕血點留斑竹湘水有時竭貞烈傳無窮借問
貞烈誰家世多儒風名秀瓊姓者馮

來宗敏

號懋齋蕭山人嘉慶丙辰進士官直隸清宛知縣著總詒堂詩藁四卷

孫德祖曰先生少以能文名越中登第後待銓於家猶設帳授徒著籍門下多達者

春艸

花睡初醒柳欲眠江南三月望芊芊燒痕歷盡塵中劫生意
仍歸隴上烟金埒暝風盤馬地繡街微雨鬥雞天西堂夢斷
無新句苦憶生天謝惠連

蓬萊閣懷古

蓬萊縹渺隔弱水入海會須論萬里誰人筆力移之來元和
謫仙元才子一誇州宅成絕唱四面樓臺當屏障後有作者
張與王坐使湖山聲價長吁嗟乎朱門畫戟迹已陳詩筒往
復句猶新當時競作蓬萊主安識蓬萊是主人

翁名濂

字蓮叔仁和諸生嘉慶元年舉孝廉方正

仿宋畫院式製團扇

春深羅綺裁宮中鶴翎鸞羽承雕龔魚鑰乍開迎曉日徘徊
紈扇動薰風蘭膏髻鬢嬌初起玉兔纖纖涼似水詩吟扇底
怯桃花衫趁風前飄杏子當年院體學宣和畫狀元稱沒骨
多花鳥寫生工宛轉雲烟過眼任摩挲馬遠圖中留一角髻
髻徐黃價瑯琢添得楊家妹子詩六宮粉黛爭相握今番畫
本是誰傳翦出規圓儼昔年憐他月鏡團圓影不逐秋風成

棄捐

李

穀

字中玉號介石嘉興原生嘉慶元年舉孝廉方正著介石詩鈔

錢泰吉撰行狀先生和厚坦易人多親之然不可干以私母金病篤封左肱和藥得漸瘳父邁危疾更封右肱卒不效哀毀盡禮嘗纂人海韻編二十年而成性愛竹先世有師竹齋失之久矣因爲圖以寄意少喜詩書初學張文敏後得褚書枯樹賦舊拓本暇輒臨摹筆法益蒼勁

古芸出畫扇見贈并承諸同人題詠賦謝時將往揚州

兼以留別

鷗邊正好鬥朋牋猶有江湖未了緣
白髮難溫鴛水夢短篷
又泛廣陵船篋中零墨光先澤
溪上飛花灑別筵明日手攜
天上月團圓看到竹西圓

張燕昌

字芭堂海鹽貢生嘉慶元年舉孝廉方正

湖海詩傳芭堂屏居邨落性孤介夙嗜金石尤愛小品
搜奇采癖凡齷缺零星都為一集名金石契子所藏西
漢雁足鏡亦并著焉又撰古來飛白書考常往甯波入
范氏天一閣在藏書中獲北宋石鼓文搨本摹勒以歸
重刻之因撰石鼓文釋存證以篆籀考其
偏旁點畫較薛揚潘董諸家更為精審

鴛鴦湖權歌

通越門邊烏夜棲馬嘶隱隱雜鳴雞
五更聽得鄰船語一道
斜風到水西

竹莊花發滿沙汀桂楫蘭橈幾度經
猶記武塘傳十詠藕花

香過水心亭

袁

鈞

字秉國一字陶軒號西廬鄞縣拔貢嘉慶元年舉孝廉方正著琉璃居稿六卷瞻衮堂集十一卷

縣志鈞父德達官京師鈞九歲寄詩曰遠思不能寐默坐觀書笥書中有所得如父親指示指示若眼前關河隔數千安得雙飛翼飛到日邊父友鄭虎文見而深器之明年父卒執經於虎文五載學成補諸生學使阮元拔置第一招之幕中鈞工詩古文詞且精康成一家之學搜其佚書二十三種重為編訂尤留意四明掌故每日攜小囊出有所得即投囊中夜就燈下錄之數十年如一日有四明書畫記四明文徵四明獻徵四明詩彙四明近體樂府諸書後主講稽山書院人共式之馮登府曰陶軒以五言得名各體亦勝清微疏宕得杜老坡老之神張大昌曰袁君後人有名堯年者為善化瞿學使所賞因請以鄭氏佚書付書局校刊為補輯康成佚文附之

嚴州道中

兩山東馭水四人共扁舟舟從山中行水向山中流水流無

時歇山連無斷絕山水莽清蒼州行多險仄夜寂枕孤敲天

高雲不飛俯首視流泉明星滿我衣明星繁耿耿援嘯山谷
靜石聲咽危泉山靜春江冷

江貞女詩

楊家孝婦江貞女生年十九心自許憶初未昏喪所天養姑
嗣夫誓獨肩麻衣如雪爲位哭上堂拜姑淚盈匊阿母痛兒
病且狂笞痕滿背勤扶將顛天起姑背痕在恐傷姑心掩其
背冢嗣遺雖甫襁褓字而翼之常在抱伯曰嗣汝禮則宜奪
兄公子辭不爲強而後可夫續祀焚香告夫今有子

黃仲則

景仁

自太平來新安留院中月餘將有武陵之

行詩以贈別

憶昔相逢歲在丑五載天涯惜分手如何復此客中別小住
恩恩未爲久君家舊在東海東君才矯矯如游龍獨憐孤貧

亦如我打包行腳身
鷗蓬鷗蓬一去知何處
風雨西冷夢中路
錦囊收盡好山川
郵筒定有驚人句
少陵已往謫仙死
後之作者竟誰是
韓門張李蘇秦黃
同學故人望吾子
我輩行藏不可常
側身東望天海長
邗堪去住同爲客
辜負桑榆愛日光

浩歌行

側身天地今古同
高臺瑟瑟來悲風
阮子白眼聊玩世
禰生雄辨能興戎
太行孟門未云險
嘯堂闕室多奇蹤
青蠅生蛆蛆化蠅
變亂白黑何終窮
彼以變亂爲性命
人禽互譏將安庸
浮雲暗山泥出海
造化乃以我爲銅
頑讒於我亦師保
士憎多口古所崇
仰天大笑白日逝
記憶細故真兒童

戴山謁劉子祠

摳衣拾級步逡巡古殿巍然展謁新講學百年傳正脈致身
一代作完人後凋節已垂青簡慎讀功誰續火薪祠下低回
心鄉往願從遺集問迷津

題碧山吟社圖爲秦小峴先生并序

吟社十人首修敬秦公旭小峴先生之祖次則陸勉
懋成高直維清陳履天澤王祿公祿楊理叔理李庶
舜明陳行之公懋施廉彥清潘緒繼芳皆以布衣工
詩所謂碧山十老者也圖爲沈啟南作失而復得先
生有文記之屬題

一卷石田畫流傳三百年溪山猶映帶杖履卽神仙劒訝龍
津躍珠看合浦圓九峯徵故事風景尙依然

地近春申澗淵源此濫觴風流能史閣

先生高祖諭
德公集名

文采賜

泉堂

先生集名世業青緗古吟壇屐齒香披圖思舊德幽興寄滄

桑

先生近作春溪垂釣圖故云

岳氏銅爵詩束金刑部少權

德輿并序

爵高五寸六分深二寸七分口徑六寸八分腹容四

合重五百十四銖中鑄精忠報國字三足二柱兩翅

左側豎耳有岳珂建造字刑部得此將訪其後人而

歸之

銅爵爛斑倦翁製武穆祠堂舊彝器二柱三足兩翅橫摩挲

未漫精忠字宋辱金蹶隨飄煙此爵於今八百年白日青天

與終古水侵土蝕猶流傳辨誣錄上將軍死從此宋家限淮

水黃龍飲恨老荒墳碧血沈冤照青史靈旗閃閃陰雲屯肝

蠻曾經漬酒痕暨陽會有山君護家廟荒涼尚里門

精忠類編珂於

嘉泰四年鑄奉祀忠武祭器宋亡悉埋土中明萬
曆閒始得自諸暨山中歸奉金陀坊第之家廟 金君好古
寫以識廟土同存問苗裔兩浙應添吉金志子乙父丁傳世
世學使阮公方修兩浙金石志

遊龍井觀董文敏臨米書龍井記石刻呈小峴先生

湖山絕幽處一水匯為井天風吹我來小立招提境龍泓徹
底清萬慮欲俱屏為訪南宮書敲礪同石筍別有龍井文臨
摹出文敏世近得完好筆力殊勁挺摩挲好古心摹搨亦佳
品緬想參寥僧當年此息影淮海昔題名風流未衰盡舊石
不可睹結念時耿耿我公淮海後仕學兩相準手寫勒貞石
筆與香光竝從遊記清暇汲水試新茗日暮拂衣歸斜陽亂
山影

題華秋槎司馬瑞瑣石門觀瀑圖

秋槎司馬天下才辭家十載官蓬萊海水清淺看未足更擬
飛瀑窮天台永嘉之瀑更奇絕萬斛水從天上來欲以無盡
灌江海亦爲不平鳴風雷石門鐵紐紐不住一落萬丈無紆
迴歸來寫向雪色紙紙上猶覺爭喧逐我亦抑塞磊落者置
想往往高崔嵬天風似吹衣袂冷層雲欲盪心胸開搔首未
題謝眺句對此絕叫胡爲哉願得從公乞餘潤遍令俗客驅
氛埃

城南觀荷

幽意每不愜獨行謝朋儔今朝暑未退且作城南遊城南古
勝地漫漫隱林邱下有采蓮人蓮花過人頭水漲一痕碧香
浮數頃秋參差互相望衍漾分平疇好風穆然至解袂臨清
流卽此得閒曠終日忘淹留高興會有盡飛光忽我遘暝色

送歸棹明月非所求

鄭

勳

字書常號簡香慈谿人嘉慶元年舉孝廉方正著二硯窩詩存左傳樂府

遊吼山水石洞次雲臺夫子韻

取道出山陰歌聲發清越沿流泝吼山一棹水雲窟危崖閉
幽景怪石指天闕薄暮陰風起凜然動毛骨不信天生成豈
假人工伐澄潭揚明鏡奇峯倒列笏山僧留春茗夕陽懸律
率小坐愜素懷古磴土花滑囂氛頓掃盡清響未消歇何當
訂再來遐想窮飄忽歸途更悵望扁舟載明月

徐雪廬屬題洞庭夜泊圖

西風吹折荒洲蘆扁舟夜宿如鷗鳧對岸極望青模黏君山
數峯疑有無畫手豈是倪家迂遠景縮入半幅圖徐君愛此
筆意殊索我題句懸座隅請君援琴我操觚約畧幽意歌巴

飲欵乃聲中客思紆蘆根寒浸波平鋪茫茫千頃一葉孤

訪孫雙溪徐雪香晚過新渡口占

訪舊歸來趁晚晴招招舟子掉波輕江湖平岸月初上夕照

懸林烟半橫幾處寒沙喧宿鳥一聲長笛動離情隔年幸有

梅花約細嚼還期透骨清

陳鴻熙

字丙南號十峯會稽廩生嘉慶元年舉孝廉方正著藤阿吟稿

余家藏篆書孝經一卷不載名款錢獻之先生堪審定

謂係楊南仲手筆因誌一詩於卷尾并柬獻之

先生篆筆精名振斯冰後秦關解組歸因病折其手辨論金

石文時復不離口孝經十八章舊蹟吾藏久用筆森琳琅結

體肖蚪蚪紙紋蟬翼輕墨氣龍媒黝古製出自誰吾疑苦難

剖或云潛翁書

謂宋劉克莊

依形孰辨肘先生眼力高考覈意非

苟謂爲南仲蹟取信十可九吾友江子蘭聞言肯以首書人
合屬揚何必更猜某古文贖本多如苗雜稂莠此卷辨旣真
寶重匹圭卣用以貽後昆聖訓願世守

見漢鬱林太守所遺廉石因賦

一峯屹豎古雲根斑駁猶餘土蘚痕名蹟特緣循吏重高風
應比丈人尊來從大海魚龍護立向崇祠虎豹蹲我見欲呼
賢太守元章珍品不須論

徐文長先生墓在山陰之木柵鄉阮芸臺中丞撫浙命
鴻熙兄弟訪其地以表之雞豚致祭歲以爲常謹賦
一詩卽以告墓

磊落孤墳三尺崇英靈憑弔百年中松楸慘澹重林古
枝枳淒涼舊卵空先生二子名枳枳皆無後誰信嘯天聲似鶴
我知埋地氣成

虹故居愧作青藤主端合春秋祀此翁

潘

賢

字可堂錢塘歲貢

抗郡詩續輯可堂經術湛深負笈從游有若公超之市詩不多作而筆力正自健舉

李忠毅公

長庚

輓詩

海風怒號海水立奮勇破賊追奔急誓掃欃槍酬

主知兜擒巨憝在呼吸突煙冒刃戰縱橫豈料倉猝頽長城

黑水洋中遺恨在

公追蔡牽戰歿於黑水洋

編氓部曲齊吞聲溯昔舟師

公總統用浙用閩久倚重髫齡自負便非常天生我才必有

用

髫年入學常用書此七字

一舟之主匪易勝誰欺把舵臣也能

公入觀

純廟詢海中事宜以柁為一舟之主對曰能

鳳尾箬橫及水澳槍礮所到同芟芳

當時海盜如鳳尾箬橫水澳各幫皆就殲惟蔡牽僅存

蔡逆未除恨未止幾番血戰摧

海市逆黨聞名魄已褫甯敵萬軍莫敵李貽書商推智勇深

甘苦與共人傾心梭船特仿同安式指揮兩翼旌旗森風雲
沙綫知之熟月夜揚帆還坐讀月夜揚帆坐讀書阮撫軍所
贈詩句也公有和詩二章
贈紵嘗賡伐木章擢才不愧空羣目助振當年德在民宮牆
黌舍同時新公有助振倡捐
重修學宮事風流儒將推第一一朝星隕滄
溟塵臨危授命烈且壯執盾持刀屹相向瞠目直視面如生
寸心耿耿何時償方今

天子褒殊忠建祠

賜諡世爵崇

九重特下悲憤詔將士感奮氣益雄從此合兵肆霆擊鬪割
淋漓奏刀砮轉瞬孫盧已就禽公其慰矣同親歷泉山峩峩
廟貌光海天渺渺靈旂颺忠魂千載自擁護淨洗兵甲波不
揚

陳春曉

字杏田號覺庵錢塘廩貢著晚晴書屋詩鈔覺庵續詠讀漢書隨詠

杭郡詩三輯覺庵為煦林孝廉子孝廉歿都下隻身扶觀歸里歷游粵楚吳皖奉母教弟備嘗艱苦其孝友有足稱者所著尚有武林新樂府風鶴吟詞行世

甲戌春將至新安以水涸改陸大雪累日備歷險惡紀

之以詩

寒雲壓天俯北風怒號恣游子欲何之負冰新安地水落溪
河乾舟楫不得利舍舟而呼輿驪駒催再四上堂拜慈親衣
上涔涔淚暮出武林城朝達餘杭寺行行策籃輿風雪寒如
刺玉龍鬪始酣盈尺沿途次山石歷崎嶇肩輿屢顛躓昏黑
投荒村輿夫多怨意亟以酒肉償牛眠各濫醉冰霰集殘更
我愁不能睡晨起復強行迷茫猶玉戲峻嶺何盤盤危橋等
懸縋險語聞輿夫一蹶驚湍墜我時急下輿欲渡心殊悸試

步且凌虛一命長虹寄橫五十丈餘懷乎寤交臂北風何顛
狂微軀已拌棄須臾彼岸登更生願始遂過橋橋又來度嶺
嶺益巋直到老竹叢入過老竹嶺即新安境矣出險詫神異晴光烘客衣
亭衢何坦易投刺達黃堂龔閩齋年太守敦風義適館復授
餐評量及文字官燭夜燒紅走筆將游記

青兒自蜀歸娶重赴西川別後寄此

雨雪歸來日恩恩又九秋挂帆仍欲去負米未能留佳偶成
花燭衰親並白頭倚門聊送汝不敢到江樓

憶我方逾寇燕郊粵海天治裝勞大母投刺迫殘年羞忍囊
中物艱難渡口船汝今行色好去去莫衣牽

秋色長江上西風木葉乾弟兄同枕被芳姪同僮僕治盤餐

莫習楚人詐何愁蜀道難鯉魚三十六書到盼平安

見說梁州地殷饒號此邦五都財所聚三倍利何強得寶原
堪喜多金莫漫藏錦城雖可樂只願早還鄉

定海令

并序

庚子夏六月英吉利窺定海遣諜馳書脅降縣令姚
公懷祥閱之忿劇顧念孤懸海外我兵無多夷船蔽
海勢張甚不可以戰議堅壁死守待援兵會剿總兵
某謂不戰非夫悉見卒出擊一戰而敗某傷股墮海
夷兵遂薄城城無一卒之衛須臾而陷公不屈死之

六月南風立海水黑雲蔽海萬鱷起斗大孤城比黑子封狼
朝食會滅此猙獰萬鬼饜而登敢肆狂言書一紙一紙招降
脅縣公縣公擲書髮上指力障狂瀾臂與指同心吾與將軍
耳將軍馮怒氣轉驕嗟哉莫敖高舉趾一鼓再鼓鼓聲雌將

軍傷股師律否裹創歸臥空營裏空眷獨張公裂毗存亡詎
復計家室誓與此城相終始眼看礮火糜百雉偏陽自度無
完理萬口號呼聲變徵東南一角城摧矣青天白日誰驅使
衆寇猖狂一令死

定海尉

并序

全公福甘肅武威人回逆張格爾之變曾隨某大將
軍麾下辦理文案功竣以吏員議敘授浙江甯波府
定海縣典史城陷與縣令姚公不屈同日被戕

縣公死縣尉孤上堂入室羣鬼呼降我生逆我死刀光如雪
加肌膚縣尉聞言聲色厲鼠輩伎倆亦何濟我官命自

大皇帝常山之舌文山涕小臣今日死節同高坐堂皇氣吐
虹朝衫一領血濺紅慷慨就義彌從容見說君家玉門裏鞍

馬從戎筆如駛本是將軍帳下身一行作吏至於此強項卒
遭斷頭死

東園十詠

迴龍輦草

宋高宗幸潮鳴寺聞潮鳴而迴駕因賜名潮鳴今寺後有迴橋互如長虹跨越清漪

名迴龍橋即當時旋駕處寺外空曠平遠綠野如繡雖翠輦巡春已成陳迹猶令人俯仰不置矣

清蹕傳宣禮佛來雲屯雷動寺門開六龍馭日園中幸萬馬
奔濤海上催菩薩低眉看綵仗君王稽首向蓮臺撞鐘伐鼓
蛟鼉起一道長虹法駕回

紅亭夕照

宋時有紅亭醋庫在菜市橋東今醋坊巷是其遺址

紅葉鴉翻起暮烟孤亭一角夕陽天酒家巷記丹楓外醋庫
坊臨烏桤邊破壁至今餘瓦甕大官自昔課金錢荒郊暝色
蒼茫甚不覺酸風挂口涎

東門菜市宋時菜市在東青門外臨安土人有東門菜之諺今菜市橋是其遺址

園蔬風味憶橋東壓擔依然聚晚菘地號青門曾結市人來

白叟慣為傭一文錢買還求益七石缸醃幸不空且喜蒼生

無此色年年雪圃甲開紅

半畝風篁孝慈庵一名半畝居東城雜記所云積水深淨風篁繞戶至今猶然

地有茅庵深復深青琅玕影淡禪心蕭疏月白出清磬夏擊

風和調素琴半畝靜生池上韻數竿涼動水邊陰到門佛面

如相識一個枯僧何處尋謂僧小石

雲錦機聲內造織局亦稱紅門局在湧金門內有神廟額曰雲錦分章

東里相傳俗最良家家機杼事偏忙百年幾易新花樣一夜

長喧古錦坊妙手果然工組織靈心卽此是文章隔鄰更有

書聲答富教由來說此邦

新路踏青

走馬塘舊時花柳繁紆號城東新路今俗稱馬路南渡宸游看新綠之所

萬綠叢中嫩欲零宸游南渡翠華停千官侍從齊拈紫一笑

君王也踏青走馬春泥迷舊隴聽鸚朝雨過長亭柳旗芝蓋

今何處往事東城記可聽

潮鳴梵唱

寺本梁歸德院宋高宗曾駐蹕聞潮聲賜名潮鳴

舊院蕭梁記得真賜名南宋墨華新鑾輿偶駐潮鳴日梵唄

初沈月落辰怖鴿靜依魂已定毒龍潛聽性能馴齋鐘粥鼓

今猶昔誰試紗籠佛殿塵

彩虹競渡

今廣安新橋夏侯巷向稱彩虹每歲重五競渡極盛

奪錦誰誇獨占先黃頭結束健兒便相傳此地彩虹渡又見

當年畫鷁船細葛香羅當夏五驚鴻駭燕墮秋千紅裙妬煞

榴花色近水人家望若仙

花燈弦管宋時茶市橋瓦子巷在此地今則街南仍呼瓦子巷街北另呼花燈巷矣

街分南北踏燈行徹夜笙歌沸舊城樓閣參差花十里魚龍
變幻月三更兩行火樹鼇山壘一曲雲璈鳳瑄鳴曾是昔年
歌舞地繁華銷歇夢難成

宮壇霽雪宋時九宮貴神壇在慶春門內方岳祭九宮壇詩有輦路新融雪未乾之句

幄幙供張典禮成鳴鸞快雪正時晴君王綵仗城隅駐士女
青旂陌上迎大道馬蹏爭蹴踏夕陽鴉背最分明慶春門內
留遺址六出花飛兆太平慶春門今俗稱太平門

江鑑字映甫一名介字石如錢塘廩生

瞿世瑛序畧江丈之畫樸茂妍雅

如讀古書詩亦蒼勁老而愈醇
杭郡詩積輯石如工六法山水學文待詔花卉倣陳白
陽爲人坦率高雅詩筆溫麗自交於宋茗香助教遂專
意摹擬漢魏以來

古詩而少作畫棗

緝雅堂詩話余嘗覽石如詩詞刻本乃是自書結體高古如其為人其讀三國志十七首如云名士厲氣節生死非所計二兒徒聰明卒為螻蟻制又云白帽厲冰雪黨綱不能禍潛龍或躍淵非時用不可又云謀畫豈不忠事賊非事漢何為王佐才去就失果斷均持論有識

繡雲石

繡雲石

欖槍夜霞妖星滅黑氣墮地胚胎結瘴雨蠻烟起螫龍突兀
又杼破空出水風搏激萬竅號日火所炙霜骨立蒼蒼黛色
補天餘元氣淋漓土花碧將軍粵海罷雷霆百戰功成語太
平獨把園林貯歌舞豈無恩怨酬平生東海先生魯連者酒
腸俠骨真瀟灑意氣傾人壯士悲能使英雄淚如瀉天涯海
角愁無所此一片石差堪語把劍論交結素心舉杯邀月成
千古粵山莽莽越山高萬里歸來別路遙感君相識贈君去
奇峯飛壓曲江濤先生垂老將軍死誰向塵埃問名士舉眼

悠悠天地寬但見雲根逐流水水流雲散恨如何
賸有寒煙滿綠莎石不能言花自笑當年池館夕陽多

韓蘄王策蹇圖

中原事去鄂王死不作將軍作名士狡兔未獲走狗烹英雄
末路皆如此西湖三月桃花浪十年攜酒游隄上更莫談兵
丞相嗔夢魂誤到黃天蕩身已清涼心內熱寒風吹我金創
裂鵝鵝膏臙劍鋒腥杜鵑枝染征袍血老妻相對柴門下醉
話江南淚如瀉蹇驢蹋遍孤山梅淮陽閒殺青驄馬按圖想
見聲嗚咽英姿颯爽髯如戟功成未必畫麒麟千秋但識騎
驢客嗚呼王義邱山重大旗百丈書忠勇鳳山宮闕龍山路
豈是相公埋骨處萬一中朝悔議和百戰沙場荷戈去

蠶詞

柴門春暮往來稀
簾幙低垂燕子飛
正是三眠好時節
茶花零落麥花肥

細葉拈來碧玉枝
四更不睡怕蠶飢
美人莫恨秋羅薄
一箔紅蠶兩鬢絲

送一峯叔之閩中

去去將焉往行人未可留
天涯多雨雪歲暮重離憂
前者廣陵客即今成舊遊
滔滔江上水去住此生浮

芭蕉

美人不可見芭蕉葉葉開
半窗斜日影橫出一枝梅
韻折風前雪痕侵石上
苔怪他心不展特與寄愁來

徐恭儉

字壽生號寶幢觀海子錢塘廩生著修竹吾廬吟稿

杭郡詩續輯寶幢生有至性孤貧奉母賴研田以養所交皆當世名士中年喪明習君平之術

萬安道中

人在千山裏舟行亂石中灘聲奔怒馬雨氣壓孤蓬絕壁雲
全白疎林葉半紅時聞棹歌發哀怨答征鴻

九日同人將游魏家寨攬翠微金精諸勝風雨不果

十年重到甯都地九日將尋魏寨山風雨若為留客住煙霞

未免笑人頑隱君自古耽泉石

明季三魏隱此今其子姓尚繁

仙子何時響

珮環叢菊未花秋影瘦翠微遙指有無閒

陳豫鍾

字浚儀號秋堂錢塘廩生

蔣炯傳畧秋堂精六書篆得李陽水法以漢人法刻古
銅印章惟拓金石文字積數百卷與奚布衣同稱石交
工蘭竹嘗集古今畫人為小傳

杭郡詩積輯阮公元撫浙時作丁祭樂器鑄鑄鐘將為
銘命秋堂摹古文以勒既成歎賞不置然招之卒不往

題趙雲巖放翁詩意圖

泐泐綠水繞蓬廬象外清幽畫不如人在荷香桐影裏午風
涼展一牀書

境地清閒孰與爭雲容午午石庚庚笑他騎馬紅塵客門外
無端觸熱行

胡理坦

字問槎錢塘廩生

揚振鐫曰問槎先生事蹟未詳讀鄒仲虎明經歲暮懷
人詩中有云通眉長爪人云是安定裔經齋事齋中間
君奚位置理學有本原知不
僅文藝其生平品誼可見矣

重修金僉事墓爲其族孫亞伯孝廉作

須眉凜凜標勁直金公立朝持正色自言僉事非懦夫畫圖
尙覺英風逼權姦當路人爭趨紛紛羣效鬼與狐天生偉人
留浩氣獨立矯如仙鶴孤十年吏部甘枯槁一朝眼見冰山
倒冰山旣倒黃河清賴公捍禦爲民保賈讓三策方濟時關

豎橫流不可支僮奴倚勢恣毒虐官吏莫敢懲其私公時僉
察臨蜀都勑姦力欲窮根株在廷尙不畏權相執法豈肯容
豪奴曳之階下亟命杖著肉聲聲鐵棒響暫寬爾主受刑章
先使爾曹知法網吁嗟乎有明宦寺弄殺機羅織正士付錦
衣惟公轉能杖奴輩快事實出前代稀黨援疏劾官竟罷歸
看湖山樂閒暇聽到旁人說朝事酒酣猶是聲悲咤後世孫
曾杳莫續人言天意毋乃酷豈知行善報轉遲九世族孫繼
芳躅孝廉弱冠工文藝追遠猶能篤先裔抔土親修下壺墳
手撫松楸哀隕涕啟篋欣看容貌在徵詩特重輜軒采一幅
丹青賴永延歲時家祭恆無怠我瞻遺像心先折是誰狀此
錚錚鐵省識孤臣面目眞想見孤臣心血熱平生風骨十分
道朝裏應多諫牘留寄言後嗣勤搜輯好備佗年史冊修

汪玉 字琢庵號小竹錢塘附貢官兵部主事

塞上曲

秋笳一夜吹飛霜寒雲壓陣天無光
尖風刺骨指欲墮鐵衣十萬旌旗揚
不見蘇子卿吞氈牧羝羊丁年奉使
出天漢歸來鬢髮皆蒼蒼不見李將軍
猿臂空挽強健兒窺邊畏如虎封侯未
得剖圭璋自來遇合都如此富貴豈藉
邊功始但教四海成一家盡作長城衛
天子

孫仁鼎 字思澧號後蘭效曾孫仁和廩貢官秀水訓導著賦山堂集

丁丙曰彼蘭少擅清才詩格深穩尤長於詞翰阮文達所賞晚歲浮沈冷宦片攝學篆者十六次咸豐乙卯乘鐸秀水年已八十矣

重至蘭溪

風景蘭江好攜孥又此行寒雲依斷塔
流水繞春城此地多

芳草因之得豔名小舟停泊處振觸十年情

顧

均

字受笙仁和廩
貢候選訓導

旅感十二首

錄八

積雨經旬勢未休蕭條客館不勝愁泥痕辛苦憐巢燕劍氣
蒼涼望斗牛捫蝨終嫌名士習觀魚喜與達人遊東門瓜亦
王孫種欲向平陵問故侯

襟懷豪縱詡凌霄疲馬來氣不驕曾倚江樓聞弄笛又於
吳市學吹簫行蹤屈指春秋燕旅思關心早晚潮卅載生涯
成底事空教投筆羨班超

功名每慨馬周遲到處傷春只自知讀史不多休弔古學詩
難好易傷時田文稷下羞彈鋏趙勝門前笑買絲獨向磯頭
看流水唼花魚少避鷓鴣

惆悵蘭風殿角薰
亂紅如雨落紛紛
昨宵夢後吟春草
鎮日山頭望白雲
花老碧闌空
亞字絲繁明錦織
迴文最傷心
是天剛曙杜宇催歸處處聞

乞食由來事孔艱
滿天風雪別柴關
鶯鶯眠水牽鄉夢
薜荔成陰憶故山
瑟瑟雛鶯嘯露腳
迢迢雙鯉望刀環
卽今四度圓蟾月
猶是飄零峯泝閒

人海蒼茫判渭涇
琴聲偏雜管弦聲
怕逢客喜譚朝政
愛讀文能道俗情
斷酒佛前皈老衲
論兵紙上笑書生
幾回欲聽華亭鶴
芳草淒淒弔士衡

故居澤畔且行吟
山鬼青楓見屈平
才亦猶人爭造命
文原無用況謀生
神仙難學嵇中散
落拓誰憐阮步兵
讀罷離騷倍惆悵
濃蘭湘芷不勝情

雄心原未十分灰，笑對春風恥自媒。
欲洗粗豪先學佛，豈無經濟且藏才。
璞經三獻纔知卞，骨市千金請自隗。
回首衡山讀書處，可曾半芋嬾殘煨。

車伯雅

字少雲，向榮子，仁和廩貢。

丁丙曰：少雲家塘樓，詩筆清麗，工文善畫，蓋家學淵源有自也。

湖上騎驢歌

金山寺前排舳艫，老鶴河口走烏珠。
鋤忠況起三字獄，河山半壁誰撐扶。
裏湖兮外湖，出梅莊兮蹇驢。
誰背嵬兮奚奴，角巾一幅轡三尺，寫入贖水殘山之畫圖。
驢乎驢乎，爾曷不爲老羆當道禦貉子，爾曷不向麒麟閣上留形模。
餘生竟得脫虎口，功狗幸未遭烹誅。蹤迹甘與磨牛似，况復照水愁霜顛。
伉儷差欣得偕老，將軍幾欲忘故吾。君不見迢迢五國城，撲

面驚沙麤毳帳盼馬角草具嘗駝酥一鞭沙磧擊毬處也有

西湖花柳無

康葉封

原名允吉字子蘭仁和廩貢候選訓導著薰可軒集臨平山人集

揚振鐫曰子蘭家臨平鎮與其兄蓮伯嘗取沈東山先生臨平記續修之做州縣志體例采輯甚富借其稿已佚

雨後湖上

雨後看山好煙容澹欲無遠峯開夕照垂柳倩雲扶水急泉
如雨林深鳥自呼酒家堪坐賞聊解杖頭沽

蔣

字葆存號蔣村仁和廩貢官湖

杭郡詩三輯葆存居杉墩性喜收藏典籍所夕坐對古
人詩則如程衛尉屯西宮斥埃森嚴甲仗雄整又如兵
交罵陣曠目揔袖備極勇敢文筆奇肆不可羈勒與黃
太然李光甫朱芸夫徐西澗陳晴巖施石樵黃步唐李
澹畦姜怡亭李西齋朱開泉結社聯吟王述庵司寇為
之訂定名曰同岑詩選厲樊榭徵君墓上荒隲請於阮

文達公為之培護表立墓碣置祀田歸交蘆庵僧司祭
掃黃太然客死漢陽經紀其喪可謂篤於友誼矣初官
慈谿訓導遷德安府經歷
保縣令分楚北卓著政聲
蒲褐山房詩話葆存所居西溪西南十餘里山環水轉
宅幽勢阻長松古檜梅花竹箭彌望無際中有陂田數
千頃澄湖曲汜復與烟嵐相間蔣氏聚族而居饒稷稻
魚蝦菱藕之利屋數十椽聚書萬卷葆存摘蔬淪茗之
外覃研鉛槧物外翛然詩學中晚唐散體文學三蘇長
於議論浙東西名士多聞名而訪之者高情朗志即不
主風雅之盟亦當
為山釋之麗也

題陳道山鍾山圖

浮江五馬無真龍四鎮一闕成沙蟲陪京九廟喋戰血孝陵
松柏烏啼風享殿明堂亂荆棘白髮山人淚橫臆麻鞵布帽
混屠沽老作雨花臺下客洗眼惟看後苑秋含情但寫鍾山
石鍾山形勢如龍蟠虛無玉座橫天關金支翠旗神恍惚疑
有劍佩朝雲端長江無情鐵鎖斷石頭王氣嗟凋殘盜環磨

劍事非故宮門重遊守兵怒放牧愁開養馬場采樵忍斫當
陵樹豈知扶杖拜鵑人臣甫低徊不能去自把頭銜署畫師
蒼涼有恨傳毫素君不見崑山顧老世稱怪霜露年年炷香
拜同行百戶諳掌故指點山林入圖畫山人山人亦其倫柴
車甘作露中身嗚呼國家養士三百載高官大爵非無人殘
山賸水吞聲哭獨有江南老逸民

書梅村集後

老去昆池劫火驚出山未許卻華纓三朝實錄歸詩史一代
風騷屬主盟戎馬徒聞哀庾信柴桑無計臥淵明陳情莫遂
巖居願高節由來誤盛名

西溪舟行玩月

溪行隨岸轉面面與月遇月色不讓人當舟占先步羣山爾

何來若與月爭赴寒翠半蒼茫沙若墮烟霧時見清輝流散
在隔溪樹山盡月復來照見前村路

冷泉亭納涼同李光甫作

風泉生夜涼月上古松頂石亭無人行峯峯散秋影窅然倚
迴闌心空萬緣淨入秋憚餘暑趨避暑苦無境誰知深山中四
時水長冷僧廬如可借終年此習靜

冬暮自南塘歸杉墩

冬溪無近渡水涸港路斷溯洄遵古塘自午每及盱寒山若
迎人隱見殘蘆岸移時入前浦溪狹如在澗進退隨水勢微
路爭一綫回思三月時桃花春水漫到門無十里快若坐雲
漢陸寒縮地脈勞逸乃縣判安得乘輕風揚帆去如箭

徐雪廬過訪草堂是日適探梅花柱山悵然有懷

我家鳳溪南君家鳳溪北溪水日夕深思君意無極相思不
相見渺渺含春愁空留溪上月照君梅花樓種梅憶西溪探
梅向天柱遲君盪舟來我又入山去九峯多白雲見梅卽思
君欲折瑤華贈恨乏山中人歸來誦君詩清言敵瑤玖悵君
不少留醉我梅花酒梅花開又殘漠漠溪風寒春心欲飛渡
愁隔大遮山

晚步西圩

明月溪上來照我柴門樹幽光散積翠因風化寒霧風定霧
旋合溟濛若無路林隙露溪光水月漾成趣安得命扁舟溯
洄向前渡

響水巖

探幽步易窮緣澗屢得路潺潺不知遠導入泉深處巖迴澗

復折巨石忽橫布至此羣流匯奔騰勢陡住雲根伏萬竅水
脈暗傾注急若雲璈鳴清如玉磬度迴環無定響節奏自成
趣跌坐臨長林靜聽發深悟山鳥時驚飛亭午滴殘露

西方庵觀雲海

西峯時險絕峭壁摩蒼穹宛轉陟梯級直下無留蹤僧庵若
鳥巢鑿石安房櫛松煙落禪榻化作朝嵐濃虛檐納空曠萬
山羅心胷須臾見鋪海白雲生蓬蓬羣峯頽萍浮出沒波濤
中晃蕩迸奇彩倒浴金輪紅積氣久始散漸辨天宇空振策
上崖岨衣袂吹罡風

犁田曲

削木爲軌橫牛脊駕以長犁約三尺麻繩雙絡垂牛腰膝高
水淺行易勞駕牛老翁頭盡白叱牛揚鞭雙蹠赤牛行在前

翁在後人半齊心復齊力雨犁水田土易勻旱犁阪田多苦
辛牛毛半脫牛尾掉驅牛不行翁怒嗔歸來解牛放道左大
牛嬉游小牛臥年年犁田無盡時問翁那不鬻成絲

屠紹理

字訥夫仁和貢生著有泉堂詩

張采序略訥夫才性豪邁詩古

文有奇氣似乃祖赤水先生

平聖臺序略屠君好二氏之學每雲水
瓢笠之夫輒與往復徵辨依依不忍去

定州折獄歌爲郭刺史作 并序

定州唐村有劉姓生子殘廢逐令乞食於市偶於日
暮自持利刃樵於野遇子歸向之嗚飢經過鄰人田
其人忽念昔日富時曾賙其鄰今鄰富而絕不知報
遂手刃其子於田順取其乞食之筐濯血於河又攫
得樹棲一雞納於筐馳至清風店卽以雞筐付酒家

贖其前質之衣更得餘錢而歸次早以鄰人殺子於
田控州州牧往驗莫知罪人因言曰是必有與鄰爲
仇者殺人以貽禍耳於是其鄰云有仝氏子爲其自
出素行無賴久與之絕或忍而爲此乃拘仝立至則
見其頸破膚撓衣有血痕並佩刃新發於硯衆咸目
爲元兇鞫之則云昨方爲李氏御車他出胡能殺人
詰其身傷衣血則云與人鬥很其磨刀霍霍則因判
羊也復呼李質之信姑置仝於獄仍飭伍伯別索罪
人不得伍伯苦於箠楚相約昏夜至殺人處見一犬
旋繞於場遂默祝云鬼如有知當引我至殺人家庶
可爲君復仇犬卽搖尾前引伍伯隨其後以五文市
胡餅一枚與犬犬引至死者之門卽枕其門限而臥

伍伯大異之因夜已闌卽借宿農家黎明往視之犬見伍伯至始起而搖尾去卽於犬臥處得青蚨五枚始悟其爲償餅值也歸以此異報之官官怒其妄又復管之會刺史寢疾醫來卽歷歷言此異伍伯又訪得雞筐於清風店於是刺史卽詣城隍祠命衆於神前對獄惟死者之父有懼色刺史出示雞筐雞於神前伏一卵而自啄食之刺史曰此卽汝自食其子也於是廉得其情此獄遂雪

定州折獄傳神奇訟由仇殺唐村兒卯金其姓年十六生來篤疾無完肢鄰居同姓有富室閒田一片容拋屍刺史本是汾陽胄民命趨視甯容遲濫褸僵仆寢人子血污遍體鱗爲肌聲淚含冤厥父母求兇不得難前知爲言昨宵乞食去攜

筐出門歸逾期凌晨行露瞥見此已遭毒手心傷悲聚觀萬
衆戚感歎擬議罪人似得之僉云全氏不才子富室自出多
淫邪靡之遠去久絕迹或圖傾陷來操鉞刺史慮涉莫須有
姑順輿情從縶維大索立得試察問兇形豈必求承詞頸似
麻姑新搔癢爪痕宛在如游絲誰將飽拳安雞肋痛遭老翁
新豐椎短後一衣坦露腹鮮紅血點當襟披自言前日御李
出縱欲行兇非其時呼李來前使對坐卻云同道俄分馳曾
見磨刀聲霍霍急令解佩鋒如犀鬥痕毒刃俱現在詞窮理
屈頭低垂刺史虛衷絕未信爰遣牙爪潛跟追月黑天昏走
曠野有犬盤旋行如癡心驚或是憑鬼物呼犬與語若有知
默祝爲訪殺人者犬似前導呼人隨因懷胡餅卽與犬曲折
數里逢茅茨犬身臥地馳不去首向死者衡門依不信操戈

有同室蚤起復到門前窺犬見人來搖尾去臥處青蚨列五
枚恍悟適符胡餅值喧傳鄰里羣嗟咨走報刺史仍未信恐
屬逃杖撫詞欺刺史偶緣微疴感當關爲報來秦醫一見津
津述犬異勿藥之喜疾釋疑三復爰書忽得閒爲問兒筐今
誰持豈知筐落清風店死者之父償逋資更有隻雞借筐去
雞筐併得獄在茲神道設教古所有撞鐘伐鼓城隍祠咸令
昂首當神面厥父戰慄渾難支示筐出雞雞翼卵神前啄穀
同拾糜自食其子有如獄毒逾豺虎伴梟鳴俯首直陳情曲
繪因子形殘遂不慈鄰貧我曾作鮑叔鄰富於今絕報施適
因刈草持鎌出暮遇兒歸又說飢殺機頓起刃作雨鄰地因
教奇禍貽夤夜持筐走濯血雞棲道樹攘爲宜遠馳十里遇
道主雞筐並償羸刀錐自謂計得鬼莫測那知發覆同鑽竈

全氏幾作桃僵代天警兇頑權羈纒衣血膚撓偶合處乃是
門很遭他箠獄情竟出物理外刺史合受神明推聊齋秋病
夜不寐為作長歌代口碑

錢

杜

字叔美號松壺仁和人候選
主事著松壺詩存松壺詩

陳文述序畧叔美以貴公子少年從宦萬里騎象百蠻
中歲落魄魄雞棲輦下復避債絕域往來古戰場其詩超

妙清曠真氣往復上之追蹤太

白次亦不失為岑嘉州王龍標

練川名人畫像小傳先生畫書詩俱極超妙以貴公子
落魄浪游足迹幾徧天下曾客吾邑至南翔道光甲辰

卒於

揚州

程庭鷺松壺先生軼事先生初名榆後改名杜嘗素逋

萬里外至則其人已歿乃焚數千金券於靈次性喜卜

居在南陽於諸葛廬旁種松結屋在金陵得陶谷餘地

近清涼山麓貞白故居也築清峯草堂庭有六朝時古

梅在焦山營草庵在西湖則卜

居寶石山下即今野鷗莊也

楊振鏡曰松壺曠達不羈精六法絕類文五峯尤深於

北宋荆湘諸家書摹二王其所為詩則超妙清曠真氣

往來吾杭三絕向推奚鐵生
布衣松壺亦未肯多讓焉

花將軍營中駝羅驄馬飄警善戰云自西藏中所得索
余貌之是日席上姚太守施總戎及諸幕僚各爲一
詩豪宕感激之意可以傳矣

黔西都護鞍馬雄勇決第一駝羅驄未從流沙走萬里滿身
汗血桃花紅黃鬚健兒控不得出陣入陣生旋風拳毛颯爽
神骨聳世無曹霸誰能工昔日善畫李伯時吳興承旨能匹
之星精未許俗手貌諸公況復爲新詩想其沙場久酣戰意
與襄鄂同英姿真龍忽從腕底出墨花酒氣相淋漓萬人辟
易戰士呼突圍夜上山梁趨四蹶蹴踏沙石裂項上欄腰如
貫珠飛身擊賊賊膽碎將軍新破松毛寨卸鞍猛氣猶奪人
十萬降苗帳前拜軍中搥鼓軍門開巴西太守攜客來酒酣

磅礴解衣看午夜壁上疑風雷憐余屢貌尋常者神駿須從
醉中寫玉鞞明日下安龍看埽欃槍洗兵馬

升庵楊先生象 并序

按先生象滇中有三本一在永昌鐵樹嶺作道士裝
一在大理寫韻樓作處士裝一在昆明陸爾玉家作
冠冕象蓋晚年爲弟子所摹存其官也此臨晚年本
萬死投荒落魄人偶然重見宰官身金雞遠寄東華夢杜宇
空嘯故國春關塞魂歸雲似墨琵琶聲斷雨如塵哀牢幾樹
垂垂柳尙識前朝放逐臣

撫雲西老人荒率意

荻蘆陰裏小徘徊薄暝輕舫且未開山葉打篷風拍水蟲聲
如雨過溪來

松影庵步月卽圖其意

山月欲上松風鳴峯影墮地溪雲生西溪門掩月初上茅茨
古琴發幽響琴聲漸幽月漸高空堂六月生寒濤隱囊夜半
看山月松影亂落如牛毛須臾簾捲月將墮谷口煙深疑有
路小艇呼來不載人抱琴還逐松風去

客有貽羅浮蠅者置籠中一夕遁去蔡松若作歌紀異

索余圖之

手持綠玉杖去踏羅浮山羅浮山裏春風還飛來蚺蜺大於
掌半空飄舉仙骨輕珊珊或云葛洪羽衣之所化罡風吹落
片片蒼厓巔烘以青城霞飲以丹砂泉遂使狡獪游人寰曾
聞淮南雞犬一一入雲去何以爾蠅尙復塵埃聞得無此山
靈秀原不異天府獨令盤踞窟宅千百年况當青蚪萬株壓

冰雪餐吸沆瀣形神堅人閒萬事不足恃昨日綠鬢今衰顏
金粉飄殘亦頃刻只可蒙莊與爾相周旋天工倘若作變幻
世上蜉蝣螺贏皆飛仙螻兮螻兮殊可憐且須騎爾黑甜鄉
裏去下視四百八峯青刺天

黃璞齋以詩冊見貽索畫爲別

垂老江干鬢有絲問君惆悵欲何之上公自許留裙屐名士
何妨食蛤蜊縱酒禰衡偏傲世登樓王粲最傷時蹇驢京雒
風塵裏珍重囊中絕妙詞

晴川閣前山月圓臥看白鷺破輕烟殘蘆漠漠黃州岸落葉
蕭蕭鄂渚船赤壁雲荒人弔古大江秋老雁橫天布帆莫問
鱸魚膾落魄湘潭已廿年

滇中黑龍潭有唐時古梅余與余蓮涇探梅歸爲頌道

寫作障子錄舊作於上

疏香拂拂吹面來黑龍潭上梅花開紫雲吹影落波底碧琉璃浸紅玫瑰尋山慣騎款段馬叩門不許奚童催道人揖客山院靜風鑑茶沸喧殷雷老榦盤空見鬚髮蒼鱗臥地棲莓苔蟄龍一睡不復醒鐵笛吹破雪千堆誰人手攜入靈境傳聞天寶當年栽千年劫火燒不死支離孕結丹砂胎人生安得如汝壽古佛含笑天公猜老夫十日面青壁放筆自喜無纖埃山空杳冥天籟絕枝底祇有山禽陪夕陽倒射殿角赤花光人影相徘徊鶴聲送客入城去衣上染得朱霞迴

關

炳字午亭槐子仁和人官雲南大理知府

御試

杭郡詩三輯午亭以蔭生應

庭訓

營繕都水二司出守滇南撫下以寬循聲卓著茲刊

格言宣布所屬學校可謂治有本源矣墨林今話稱其

寫山水深得婁東正派曾作
觀瀑圖酣潤淋漓咸生歎服

琴隲招同陳樹齋提督遠斐太守及積堂上舍小集潛

園遠斐得句而未成章因用為起句續成一律

雨意流連似酒人嘯歌終日不嫌貧龐眉尚帶風雲氣史筆

爭傳翰墨春壁上松篁沈古色胸中邱壑貯天真琴隲於倚松閣自畫

素壁寓公多在河橋畔難得尊前半是鄰

汪成穀字栗田號春雨仁和

人著春雨草堂小橐
蔣炯傳畧栗田性高簡工畫從奚風游
森秀疏挺出入文沈諸家詩亦不俗

琴塢索畫山居圖冊

開牕羣峯來一畝足棲止讀書深林中襟懷澹如水故園讀書處

雲影落松根溪流溼花鳴隔林聞琴聲幽人在何許琴隲

吳玉輝字亞白海甯恩貢

吳振棫曰亞白先生行慤而性慧善為青白眼見統禪
 兒則鄙夷不與語游蜀中時余執經門下凡九閱月其
 後南歸館吾仲父家甚久意有所觸輒託之吟唱日有
 常課雖互寒隆暑不輟故所作不下萬首論詩宗尚辨
 香在初自翁不屑稗販組織亦不屑弔
 詭矜奇清麗流轉有流風回雪之致

游橫山

嫩涼六月洵可貪尋山遠過溪橋南穿蘿帶荔不知險開襟
 領受松風酣就所登處一縱目蛤田螺岫齊按藍海風疊疊
 遠無數煙雲一氣相吐含此時但聞鳥鳴澗似與蟋蟀廣清
 譚到來亟問山中僧君何修兮住茅庵日日跛腳朝晴嵐

掛瓢堂

雲壑風泉處山人此結廬松聲流石徑竹翠藹庭除我亦巢
 居子襟情野鶴如欲求瓢飲地無計侶樵漁

沈毓蓀

字蘋濱海甯歲貢
 著琴硯草堂詩集

翁心存序畧先生文似魏叔子詩似查初白性耽山水
每遇林泉勝處輒攜筇屨躡屨險探幽或累日不返其
於軒冕之榮泊然無足櫻其念者而浮湛塵俗
邀遊公卿間又苦東方曼倩嚴君平之流云
許楣傳畧先生創議建仰山書院家以是日落獨身至
貴州十餘年雖弱困不妄干人山陽李公宗昉督貴州
學聞其名欲令一見使人示意執不可李公持詩約游
山乃偕游極躡至江西主講靈山書院有年卒諸生祀
之比喪歸仰山亦祀焉喜任俠將之江西己治行矣聞
族人某病且寔晨往候門啟直入出囊中金投牀頭勸
之藥卽促步登舟所齋無
數月糧也其他事多類此

文學泉有序

泉在湖北沔陽州西唐陸羽嗜茶汲泉於此後人因
名文學又名陸子泉客有自楚來者其品茶述及
此泉遂遙賦之

不有汲泉者誰知泉獨清千秋人已古一勺水留名文學風
流客茶經月旦評何年沔陽去試聽沸鑪聲

過方伯通先生祠 有序

先生諱法安徽桐城人明惠帝朝官四川斷事燕藩
篡位以登極賀表不署名詔逮付獄至望江華陽鎮
投江死祠卽當年殉節處

燕燕巢京國沈淵自潔身高風合師弟 先生鄉舉出正學方公之門 終古

有君臣蜀道山川遠江南俎豆新靈均祠咫尺蘭芷若爲鄰

祠鄰屈原廟

孝烈橋 有序

弋陽謝氏葵英宋末疊山先生女適安仁運判周公

銓早寡無子國亡後聞母死於獄父死於燕遂鬻匳

具造橋橋成投水死鄉人名其橋曰孝烈橋

闔室全忠一死甘長留橋影臥寒潭曹娥江與銀瓶井並峙

乾坤鼎足三

羅

枚

字聲甫富陽諸生

家傳習聲甫能文善書工刻印精鑒別父五長先生元
濟好蓄古書畫金石有子名相能讀書已娶婦生女矣
忽病沒五長先生哭之慟後生聲甫與相同日生因呼
曰阿同幼穎異就兄遺書若成誦然咸謂相再世師武
進張皋文通鄭氏孔氏虞氏學手鈔書數十種楷法精
妙生二子長曰勳後為諸生次日杰未三歲能言祖父
抱手中識字數千雖篆隸亦識之比入塾能盡記塾中
人一日書年十三盡十三經史漢文選諸書兄為制藝
輒私作禁之欲其大有成也明年塲於其篋得小冊以
墨筆貌家人而往來親友及童僕皆具無不神肖聲甫
因是鬱鬱年逾四十卒聲甫之生異矣而杰更異造物幻弄有如是夫

題鐵生丈仿大癡富春一角卷子

冬花庵主今子久淋漓醉墨落人手臨江突兀富春山乍見
如逢大癡叟渾然元氣凌滄洲意匠所到全神收白龍飛出
半空際巖泉百重挂樹頭濛濛散作三春雨披蓑負耒青疇

聚老農莫怨耕作忙西牽東帆苦行旅大江滾滾日夜流數
峯相對明雙眸青鞵布韞自此始動我遐心在釣裘

王尚珏

字若農嘉興人官廣西西林知縣

蒲褐山房詩話若農尊人元啟通經術兼擅古文而日
久叢雜尚無定本若農從子南昌盡發所藏編次而收
錄之為祇平居士集若干卷頗完善後從書館議敘發
粵西以才名為巡撫謝蘊山所知招入廣西志局所存
詩數首猶是二
十年前所作也

陽朔山

陽朔富奇山厥狀失常律無草木與土峻嶒撐瘦骨不作蜿
蜒勢歷亂爭地出凌霄建牙纛摩空搖健筆或銳如劍鋸或
妥如繭栗高騰若鸞翔羣奔若獸逸或莊嚴若神環向作輔
彌或傲岸自喜爭長不受屈或如朝玉京千行拱象笏或如
臨太液萬柄芙蓉發聚合偏兩陣頽散戰潰卒縹緲結蜃樓

玲瓏構仙闕神光幻離宮靈氣紛蟠鬱凡茲險怪形一一難
盡述將比雁宕山奇麗詎能匹山谷詩懷嶺環城如雁宕我來乍見之眩
惑而自失大地如文章格局良不一生面此獨開窠曰真盡
脫造物何狡獪借哉此西粵

殷樹柏

號雲樓秀水附貢著一多廬吟草

府志樹柏書法遠師柳誠懸近參汪退谷畫尤高潔家西郭外自號西疇桑者

題計曦伯二田齋圖

二田謂石田南田

玉躑金題愜臥遊平生師友是前修區區贖墨因人重耿耿
精芒歷劫留畫隱三吳尊此老毘陵六逸拔其尤南能北秀
衣珠在異代相望四百秋

白雲白石互周旋簾閣心香爨篆烟名迹遍搜三十載膏腴
如買十雙田前身賈島詩成佛後世桓譚蠹亦仙有約晴窗

來讀畫乞靈同拜雨高賢

汪雲 字雪谷秀水人 著借春谷詩稿

石瀨山房詩話雪谷好吟詠嗜酒性豪縱不羈寄居蕭寺終身不娶詩筆操縱自如英銳之氣咄咄逼人卓然

於及山人梅溪 叟外獨標一幟

古刺水歌 銅罐上鑿永樂四年熬 造淨重八兩罐三觔

半月沈江天地變江山竟屬南飛燕外藩未省中流難取寶

船歸俱革面梯航重譯朝京畿火珠煖玉生獲猊况彼古刺

近邦域大小宣慰分官司 大古刺宣慰司小古刺 長官司俱永樂四年立 甲煎此水

充土貢蘇合芬陀相伯仲氤氳遠勝薔薇露六宮笑靨風生

動欲使常留百和香內府熬罐勤珍藏旁鐫細字判銖兩泥

封不少漏春光三百年後金甌破埋沒荆榛塵土漉市人買

得莫能名徧叩知音炫奇貨我謂是罐甯足珍國家所重惟

民人不寶異物遠人格召公作誥真賢臣若貪一灑香不滅
流芳何似忠義血方連當日濺襟時方正學連御史殉夜夜
長虹光耿烈

蓮隱庵蔣孟卿畫松壁

筆湧翠墨騰光蔣生畫法何堅強喬松百尺移來插敗堵勢
若老龍拔地奮出鱗甲之而張風雷昨夜迅且烈檐際時觀
雲濤狂澄潭水沸流汪洋怪石鬼立森昂藏倘無慧力善馴
豢幾不點睛神物破壁凌穹蒼

陳

祁宇紅圃嘉善人官至
陝甘總督著蘭行草

府志祁由騰錄議敘得郃陽縣丞升臨潼令直教匪不
靖生擒首逆李貴誠歷陞甘肅布政使陝甘總督著有
從戎草南國雜詠新豐吟稿商於吟稿尤敦本誼
叔祖孝泳欲勸義莊不果祁與堂叔際贊成其事

鎮遠橋

黃河滾滾濟無舟誰建長橋據上游萬里金湯通徼外千尋
鐵索挽中流寒烟落日風濤靜淡月清霜關塞秋兩岸岩巖
撐柱石晴虹一道鎖神州

黃若濟

字子未安濤弟嘉善人議敘布政司經歷著百藥山房詩集

府志若濟年十三五經成誦專嗜韻語別有會心又精岐黃術濟世多活人故以百藥山房名其詩

寒柳

眉黛消除老態增樓臺到處暮雲凝畧餘陶令半梳髮時閣
沙根一寸冰古驛斜陽嘶凍馬荒隄殘月挂空層六橋此日
知誰訪讓與枯僧策瘦藤

晚坐

綠窗深處暗莓苔籬豆花低向晚開壞砌幽蛩轉淒切一絲
涼月上堂來

朱錦琮字尚齋海鹽人官山東東昌知府著

府志錦琮少穎悟刻意為詩古文詞兼工書畫

仁宗賜以膳錄議敘投磨江知縣旋署泗州所至興水利勤撫字

宣城遇水災力籌拯救皖撫陶澍目為賢員致仕歸卒
年八十有一

曉發七里瀧望釣臺

月落曉雞催扁舟鏡裏開紅扶江日上青湧海烟來石撼灘
聲急山排水勢迴畫眉鳴遠岫知是釣魚臺

書施愚山先生集後

南國風騷主西湖岳牧臣勝朝留璞玉

昭代獲儒珍吏事原經術詩篇感隱民持衡除請託品望軼

羣倫

胡元熙字春如石門廩貢官常

山教諭著西湖冷齋集

奉贈夢花三兄

相逢卽相契論畫復論詩又聽琴三疊同傾酒一卮雅懷君
自寂俗慮我猶羈薄暮各揮手蕭蕭葉落時

胡金題

字品佳號瘦山平湖廩生著桐華館詩鈔

縣志金題才華富有承其家學工詩文詞賦嘉慶甲子知縣路錚延修邑志金題搜討之力居多

經難沮精舍故址

掬月拈花迹已非舊題零落澹禪扉
高人去後清風歇叢石孤松近十圍

登陳山懷李潛夫先生

山游得佳趣足力未云憊有若逢故人不厭日
酬對微雲弄薄陰連巖迭明晦落日未歸林
猶閃寒鴉背一徑上荒臺絕頂俯松檜樵響入
西風落葉生秋籟緬懷龍湫隱餘生老禪

界何處訪遺蹤寥寥聞梵唄

送李許齋師奉

特旨入都

清獻曾為嘉定宰蠅旌今又莅當湖功名竝拜郎官秩學術同超漢魏儒一例

殊恩邀破格千秋精鑑屬當途何須更勒公歸集滿篋新詩語不誣

楊鳳苞

字傳九號秋室亦稱西園老人歸安廩生著有秋室集十卷

府志鳳苞早以西湖秋柳詞有名於時經學小學皆有根柢尤熟諳明季事嘗為南疆逸史跋十三篇補溫睿臨之不備而訂其誤陳焯有湖州詩錄之輯為增補數百家并考其爵里晚年館郡城陳氏其書室為鄭元慶魚計亭人以為元慶復生云

嚴可均序畧傳九之詩初敦義山後服膺竹垞晚年畧仿樊榭大較多隸事尚詞華其光黜然未絢朝采獨七

言歌行沈雄激盪大放厥詞如范忠貞祠貫休羅漢梁
將軍畫蘭諸作實兼空同竹垞之長卽詩而傳九可傳
矣

題訪書圖

有序

劉三

桐

少好聚書楚游歸後搜羅益富積至數萬卷

築眠琴山館貯之猶以爲未備嘗屬杭人奚岡繪訪

書圖以見志惜不中壽淹忽卽世嗣子煥幼弱其書

皆爲市人竄取以去可歎也君從子煥寶弄是卷出

示索題傷逝者之不作慨遺書之悉亡頽唐老筆言

之不文聊以紀實而已嘉慶十五年涂月

尙贖奚生畫香廚久棄捐傷心餘簿錄過眼付雲烟壓架猶
如昨充箱孰與遷藉君珍此卷想像舊瑤篇

自古圖書厄多經劫火亡未聞豪賈敢舉作債家償編校留

希弁飄零憶蓼塘披尋一振觸老淚忽淋浪

臺灣賊平紀事

蠢爾么膺寇瀕年擾海邦

九重移劍寢萬國罷耕耰幾竭中華力難招外叛降

睿謀深密勿方畧布洪厯烈炬銀山燼驚濤鐵板撞前軍縛
裘甫單騎馘王雙昧雉聞經廟窮後類舞幢禽姦搜窟穴脅
從赦愚蠢朝捷紅番市宵傳玉女窗營門櫜羽箭武節偃牙
幢送喜

天顏霽騰歡父老噓覃威原四訖金鼓永無撻

巨力資師武

王心協泰交庸勳頒鐵券樂曲譜金鏡畫像蠻荒懾鐫碑斗
極捐重洋洗兵馬孤島築檣櫟彌矢回江介矧弓指魯郊傳

百計車車系金
身一
三
川
觥五醑酒行炙萬牛庖玉局分曹角璫鉤隔座拋舞圍鶯燕
陣歌倚鳳凰巢寶氣行營歷歡聲使節嘲

紫宸恩禮重白屋愛憎叢莫論酣呶狀能邀大度包止戈欽
聖德薄海靖雄虓

紫禁鑪烟合

彤墀扇羽排獻俘

雙闕迴奏捷五侯偕夾斧霑松社縣旗示橐街禮氛銷日月
輪輓奠江淮

帝念安危繫

皇靈遠近皆

鸞輿標翠鳳虎旅駕黃駟蒐乘京畿左營軍少海涯水犀回
勁弩金翅列層碑碣石觀圖陣螯波映鞞鞞和知鳧藻樂怨

笑鶴軒諧師律謀惟豫車攻美既差應令西寇格稽首舞干

階

時勦西藏 救進

肇亂嗟貪吏苛求閔下農酷多遭尉楛危敢避軍鋒一死猶
餘臯三郊不自供聲靈規舊甸罰亟別羣兇

大德寬孥戮渠魁媿發蹤方將租賜免豈靳爵酬庸法立臣
僚警時和赤子逢丕基千里共薄海百年恭事定還追始
恩流訝許濃擇音思挺鹿辛螫慎莽蜂綏靖民蘇困遺災歲
告凶勿興措克位化外亦

王封

梁將軍

朝柱

畫蘭歌爲金上舍

鑄賦

將軍畫品入神妙揮灑獨得天機深尤工寫蘭古莫比熙筌
沒骨非同心少年出塞控鳴鏑醉磨盾鼻馳草檄跳盪共推

何斤曾子賣策

卷十八

楊鳳苞

巳

勇絕倫游藝誰憐畫無敵憶昔

王師下金川明堂獻捷圖凌煙將軍論功初第一褒鄂英姿
信嶮崢丹青老去娛天真蘭蕊百矢常隨身疏花瘦石洗凡
俗屏障肯爲豪家珍乃知技進不名技尺幅流傳見能事想
其磅礴蘭綺中解衣玉帳軒翠氣麝煤亦足張吾軍點染國
香作服媚展卷彷彿煙雨溼空濛一片碧湘立湘妃手把青
芙蓉淡掃眉黛橫釵茸筇竹低垂零露濃淋漓墨瀋春無容
屈平不作所南死借問粉本來何從當年師次巴陵道是處
馬嘯蹋瑤草佩纓采配玉轆轤鞭指夕陽紅更好戲拈秃管
如挽彊綠葉紫莖束箭橐歸來自署馨列侯金券策勳竝永
保丈夫肘繫斗大印左執吾矛右持盾鏖戰皋蘭爲國殉方
今戈船下瀨迅將軍急爲肅士馬萬里乘風鼓角震橫海露

布闕下進莫耽縑素縱筆陣金子寶此過縣黎嶺表壓裝手
獨攜鴉叉畫靜挂東堂屏去寒具邀我題瓊芝靈液照窗戶
我信鈴符錫君祚燕姑夢協大人占他日添丁慎交付

謁韓斬王墓

斬王古隧莽遺蹤尙記炎興第一庸殿上螺書方郭台軍中
畫鼓壓張穰兩宮環佩還何日北府金繪歲自供想得英雄
猶飲恨射朔無樹繞崇封

錦衣驄馬陣前排將畧優閒見雅懷豈必醜人酬橘茗可憐
棄地到江淮罷兵歸隱詩情健抗疏和戎壯志乖莫以張劉
名竝列千秋鄂國許同儕

朔漠塵蒙殿帥撓主憂須共敢云勞魚梁擣穴雕戈奮鴉口
捎鞭羽衛牢巾幗遺來羞末坐行營令下肅秋豪他年報國

還留語忠字爭教諱汝曹

南渡江山入暮雲中原百戰竟中分徒頌龍腦藏題湊終賜
金蕉策異勳石馬尙嘶燕塞月墓門誰畫背危軍六陵回首
冬青老夜夜唳鴉不忍聞

巖大

可均

以謁文信國祠詩見示賦此和之

錢塘王氣一朝收龍首黃扉是夢游萬里魂歸崖嶺月三年
淚盡薊門秋綠荷指塔河山改朱鳥登臺竹石愁柴市遺祠
冠劍古當時祇悔混旃裘

閩粵驅馳劫業難皇輿敗績路漫漫三宮帳殿龍沙遠九禁
樓船海水寒北極星辰扶正氣中原天地望黃冠指南錄裏
精靈在風雨空齋不忍看

洪忠宣公祠

龍庭萬里使車勞，璇榜丹青異代褒。此日虛堂依宋闕，當年
改館痛秦牢。輞軒集在風霜苦，翰墨書成閎閣高。太息南歸
又遷謫，奠椒須侑楚臣騷。

題阮大鍼樂府

一年江左小朝廷，夜飲朝眠曲未停。不管馬蹏渡揚子，檀槽
親撥教諸伶。

漏舟焚屋鬪妍華，舊院風流屬內家。一自劍堂新曲奏黃旗，
清曉進蝦蟇。

研紅箋小敕填詞，狎坐吹簫逐燕娛。卻笑齊梁風味淺，破家
時節酷裁詩。王次同句

秦淮烟月夢中消，樂府猶傳寫韻嬌。留與水天作閒話，桃花
燕子送南朝。

補正湖州詩錄成發書巢先生清遠樓詩存讀之回環
雜誦研味無窮真覺毫髮無遺憾波瀾獨老成詠歎
不足繼以聲歌爰得二絕

風雅西吳久寂寥
輪翁一去海珊遙
羨君小展回瀾手
強弩三千突射潮

燕秦楚蜀道途難
真得江山萬里看
更向粵南窺漲海
魚龍百變繞詩壇

孫廣南 字唐陸歸安諸生著訓經吟

書窗漫賦

累土為牀紙作屏
書牕寂寂晝常扃
交情舊雨兼今雨
歸夢長亭更短亭
掩鏡怕看雙鬢白
伴愁長照一燈青
最憐酒醒更殘後
無數嗁鴉帶月聽

遺夏大 蓉江 烏菱並東一絕

儂家生小住菱塘怪底年來滯晉陽等是有家歸未得試嘗

鄉味當還鄉

周

農

字稻孫號七橋歸安人著鐵瓢詩稿

嚴可均序畧山人名農藏鐵瓢二人稱周鐵瓢死時以
一殉葬一歸友王二樵二樵名傲吳興之藏古甌最富
者也鐵瓢詩皆格致清空如斷澗流泉疏花獨笑其尤
朴老者五言如落葉云野徑無人迹長天一雁鳴紅橋
夜泛云天下三分月揚州第幾橋七言如酬於松坪云
游絲忽墮壞闌曲柳絮亂堆枯硯池得老母書云書中
屬付無他語兒早歸來勝
得官後世有目者當知之
墨林今話鐵瓢道人初學芥舟作山水兼寫真後悉棄
去專畫梅神似金冬心小詩亦如之平生孤潔不娶詩
畫外一無所好應潘朗齋大令聘客邗上數年歸以所
積畫梅潤筆葬其親時人謂之梅花墳陳無軒學博為
作記逾年病作以詩稿付友人奚榆樓以鐵瓢付王二
樵而沒同人葬之道場山孫太初墓側其畫得梅之天
真筆力不如童二樹羅兩峯
而水邊籬落閒意似為過之

兩浙輞軒續錄

卷十八

周農葉成英

望

中秋對月懷潘東廬孝廉

素影滿尊前何須更問天
一年秋正半萬里月同圓
獨酌南樓上懷人北斗邊
長安今夜客悵望定遲眠

寄沈東搏

一半春光客裏過白門柳色近如何
昨宵聽盡階前雨未抵
河梁別淚多

自題墨梅

瘦於修竹淡於蘭枝北枝南春正寒
昨夜有人橫玉笛白雲
飛過碧闌干

幾枝老幹逗疏香殘月無痕鶴夢涼
畢竟林逋風味澹千秋
配食水仙王

葉成英

字華甫長興人
著未若偶鈔

畫溪消夏襟詠

竹樹陰森野水旁，鄰翁相對話耕桑。
廉纖幾陣黃梅雨，借屐東皋看插秧。

沙坳新漲浪文回，為愛漣漪坐石臺。
知是弁山山果熟，隔溪聲喚賣楊梅。

胡

珏

字連崑號韞石德清歲貢官紹興府訓導著韞石山房刪存越中吟

渡東橋是余忠節公焯殉節處

古渡春深碧草長，當年授命此遺芳。
痛心未上橋山諡，蛻骨猶隨鑑水香。
豈有短兵仍巷戰，更無餘策挽朝綱。
衣雲閣畔忠魂共回首，高城月影涼。

柳橋是王正義先生

毓著

殉節處

美人簫鼓振華堂，寒水孤燈更可傷。
義士有靈光日月，書生

無計莫滄桑前身定是王炎午後死應招潘子翔寂寞惟餘
山上鼓年年長與佐馨香

吳存倫 字心常鄞諸生著鄞江詩草

來青閣登眺

烟霽舒清眺登臨向晚天山遙青入戶春暖綠生田古木人
家住輕帆野渡前何須名勝地卽此亦陶然

張烜 字熙春號雙湖鄞人大興籍諸生官雲南會澤知縣著梅閣詩草

家傳畧烜隨父鯤遊京師因補大興諸生議敘桐城縣丞累遷曲靖同知所至多惠政任會澤令距城四十里地日則補有山縣互百餘里布種歉薄乃視形勢召業戶語以開山灌田之利鑿山一穴引江流灌漑勸建石門度水漲落以時啟閉成良田萬餘畝民立生祠祀之

壽樟歌爲綠野明府作 在江西泰和縣東郊

君不見壽陽宮裏一樹梅榮華轉瞬不復開又不見玉華園

中干株杏看墀人去春光冷惟有此樟壽縣延風霜閱歷千
餘年大可十圍高百丈晴空靄靄浮雲煙宛若蒼龍飛天際
鱗甲觸動聲鏗然我來午夏日似火綠陰濃鬱覆道左清氣
逼人涼風生行者不行坐者坐一樹之蔭人依庇何況百里
宰縣事願君愛民如愛樹栽之培之興其利願君惜樹如惜
民芟之剔之去其弊慈愛分明爲政心及物功深非小惠古
來譽樹多虛詞眞意無若甘棠詩壽樟之壽不可量壽樟之
歌意在斯

入滇南境

萬里行將盡蕭蕭木葉秋黔山回首別昆海入天流地軸開
金馬郵亭老石蚪據鞍先問俗今歲喜豐收

登小孤山遇雨

陰雲垂野岸古佛壓峯頭海氣春蒸雨江聲夜入樓
龍鼉時出沒島嶼遞沈浮俯視蒼茫外乾坤一釣舟

潯江晚眺

晚泊潯江口蒼茫日影斜五峯空翠合雙闕暮雲遮
紅柏霜中葉黃蘆水面花年來羈客慣無淚灑琵琶

施搏九

字圖遠號補傳鄞人著止止軒橐

縣志搏九自少敦行至老不怠嘗立功過格以自程邑人戴某家貧負欠以幼女償為贖歸嫁土族里有孤寡失依者六家咸使得所土盜徐景範等擾境官捕之未獲率鄉人縛以獻邑令稱為仁勇云

春日喜晴

霏微連日雨幾陣野風清簷溜餘殘滴村煙逗晚晴
落花香馥馥好鳥嘒嘒極目憑闌處前溪聽水聲

周

開

字虞中號鐵山慈谿歲貢著南陔草堂吟藁容瓠庵詩藁

鷄上詩輯鐵山爲青剛次子抱才側儻涉歷湖湘所至
皆倒屣佳句如香人魂夢梅花帳綠我鬚眉竹葉窗三
千丈髮因愁白九十月春如夢過病際春暄得少健老
逢花鬧轉多情釣臺云黃昏不避先生面我亦漁樵隊
裏人皆饒性靈語不
僅以風格見長也

鄭喬遷序略余髫髻卽識先生時先生以
醫術嘗往來余家與至談詩欣然忘倦

顧孟士席上觀郁老人舞刀作歌贈之

元和老人八十餘鐵爲筋骨銀爲鬚自矜膂力虎不如酒酣
對我氣更豪揮杯起舞雙寶刀刀鋒上指蒼天高忽然騰身
向前搏健如白牛怒奮角角裁奮時刀倏落忽然翻身向後
倚矯如白龍驚擺尾尾裁擺時刀倏起前刀未回後刀接兩
手盤旋勢轉急颯如身裹一團雪爾時觀者膽欲破回身轉
面忽對我收刀復向樽前坐嗟此絕技世罕有八十餘年無
敵手惜哉不遇今皓首三吳古多奇傑士有才不試徒老死

生死難憑類如此我今慷慨爲作歌
老人老人如刀何且酌樽前金叵羅

古塞下曲奉和嚴將軍

驚飈動地起颯沓摧枯桑城頭噪野狐
月白天荒荒將軍集萬騎夜駐黃河旁
飢馬齧殘莖鐵衣被嚴霜鼙鼓暗不鳴
鐙燭慘無光中夜坐按劍四顧心徬皇
白登圍未解青羌方狝猖羽書日馳逐
焦勞何敢忘功名遠難期坐令鬚鬢蒼
仰面視太白爍爍生寒芒

黑狗灘

黃頭忽戒嚴黑狗灘勢惡怒湍礪石齒
巉巉吐廉鏑有寶畜人鮓饑口恣吞嚼
我時駕輕舸勇進不敢泊差喜帆力健旋
怪舫聲弱俄頃落深塹目眩昏且錯
瘳石疑老魅白晝向我

搏巨鼉起舟尾昂首來霍霍日色低慘淒天光遠冥漠前進
已魄奪後卻亦膽落吁嗟陟畏途誰復黑狗若整冠起危坐
平生仗忠恪

黃婆峽

黑狗險纔出黃婆險復接灘聲戰怒雷崖傾石崩裂幽壑蟠
老蛟垂涎思吞齧鯉風刮面吹毛髮皆悚立危舸如斷梗飄
忽隨流撇媿我頑劣軀征途屢屯蹶犯危志雖堅閩險氣欲
奪徒切垂堂戒苟且倖存活回飆忽振蕩前舟遽漂沒同侶
顧余言殆哉慎毋忽變故詎能料禍端起倉猝善持臨履心
前途方岌岌

春別用薩廉訪韻

垂楊小苑重門閉香溝水暖流澌膩春階綠漲舊苔痕傷心

一步門前地花霧濛濛日就午落紅起作迴風舞重尋香夢
蜨魂癡解結同心梔子苦帶圍漸減腰圍瘦相思和淚拋紅
豆凭闌聽盡杜鵑嗁梨花月冷黃昏後

登臨湘城樓

巴陵橋下水平隄水上雲連古堞齊遠樹綠圍紅店小亂山
青壓郡城低路分野廟黃陵北帆渡空江赤壁西正是客懷
消未得竹枝聲裏鷓鴣嗁

白巖訪沈隱君題壁

白巖幽絕處茆屋結層巔雨瀑一簾雪風篁萬帚煙心空塵
外地春永靜中天偕住能容我書還讀十年

陳熙臺

字初佩號蕙圃鎮海貢生

感遇

漢世重賦才司馬富詞藻遊歷咸陽城未得展懷抱返轡歸
成都沽酒甘潦倒車騎貨已盡滌器容枯槁天子讀上林嘖
嘖屢稱道恨不覩斯人怒焉心如擣時維狗監侍言是相如
草一紙徵書來烜赫建旗旄身後猶見思封禪求遺橐設無
薦剡人臨邛市上老

渺渺太白才庾鮑合一體少陵尙心折後塵誰能企雅調寄
清平天顏爲之喜自是詩人雄謫仙豈虛擬草莽識英雄殿
廷藐力士斗酒寄天懷爛醉長安市功名不可期富貴等敝
屣乃以陷永王因之流落死至今采石磯悲風發寒水

夜泊澈浦

鄉國今初別遙遙客路迂水翻山霧白舟泊海雲孤漁火看
明滅潮聲聽有無故園人未寐屈指計程途

陳廣甯

字默齋山陰人官雲南騰越鎮總兵著壽雪山房詩鈔

吳錫麒序畧默齋工詩文以難蔭官守備効用浙中諸大吏多以文字契合而君嘯歌不廢也既而防守海昌始有專責指揮所及士識將心又塘工最爲險要君能先幾相度措施得宜數年以來海上無事蓋賴有君坐鎮也

羊石山懷古

肅遣崔則防守屯兵於此以討董昌

落日澹斜暉
禪林響疎鐘
石壁獨秀峙
天半明芙蓉
羨茲洞

府靈開山聞
越公溪風一
片來搖漾
獅王宮丹楮
林吐春青

蒼天倒空緬
昔錢武肅討
亂成殊功
誅昌及千載
猶復留英

風瞻念屯兵
處悠悠感無
窮

登六和塔感興

高懸七級做
疎櫺江畔峯
巒列畫屏放
眼欲窮天水
碧舉頭

空戀越山青
千年事業塵
沙劫卅載流
光草木齡悟
卻菩提

明鏡意不應身世歎飄零

陶際會

字立峯號舊庵會稽人

家傳畧公自少不慕榮利好讀書尤熟史事性孝友兄弟三人同寢饋無或離中年入蜀為記室有元瑜之目以母病歸侍疾躬親湯藥滌滅

箭二十年如一日子四皆貴顯
秋夕獨坐有懷菊隱五兄查仙七弟都中並示大兒慶

章

析點隨風隔巷傳房櫳如水早涼天孤燈況味人誰共破硯
生涯我自憐別後始知兄弟好老來惟望子孫賢長安黃耳
無消息獨倚吟牀耿不眠

阮嗣宗

別有傷心醉輒歌竹林風景鎮婆娑如何絕口無臧否偏是
看人白眼多

陳元驥字德稱號北坪蕭山

家傳略公性伉爽戚友以迫切相告無不應秉鐸當湖時捐俸錢修齋舍與諸生絃誦其閒多所成就重建本縣明倫堂湯文端公書碑紀其事入祀報功祠

由靈隱至韜光

龍宮高聳翠微巔當戶泠泠漱冷泉谷轉路從青嶂出境奇

人向白雲穿竹聲幢影閒如畫皓月清池別有天待到破光

心更遠幾回來坐學枯禪

黃徵謀字慶貽號莢年餘姚人

宗稷辰傳畧先生承忠孝一脈之傳當門祚艱危之際含辛茹苦色養二人嘗作守儉說言士人立品勵行上不貽祖父羞下不貽子孫累皆自節儉始故終身布衣糲食視一毫非義若將浼焉廣覽羣書好古文詞尤喜吟咏授徒數十年以敦品立行助弟子多所成就每晨必玩味儒先格言則以古人格助子弟多所成就每晨之與人交際坦懷相示胸無城府或以非禮相加亦不與較由是遠近稱為長者

送源兒郡試

十日秋霖注未休
布帆初製促登舟
江峯新浴連蒼靄
野水平添趁迅流
每論人才傷晚近
須知祖德在千秋
讀書豈爲浮名計
行卷塵中莫浪投

過方后山山齋

百卉盈庭草不刪
門前日夜水潺潺
清香一縷消長晝
濁酒三升看好山
浩蕩襟懷新月上
疎狂態度白雲閒
倚松解帶真堪隱
且避塵霧靜閉關

呂

迪

字長吉餘姚諸生著
辰山山房詩藁七卷

家傳畧迪天姿英敏弱冠受知韓城王文端公補諸生
性耽吟咏客遊金陵北歷河洛燕晉所過勝蹟紀之以
詩詩境得江山之助益豪邁蒼渾書法尤卓絕道
州何紹基見其墨蹟以爲足與石菴覃谿抗行

獨遊法戒寺

看紅葉過野橋去隨白雲尋山寺來龕小舊同彌勒住芋香
仍與嬾殘煨鉤簾花雨諸天笑倚閣松風萬壑哀詩興獨遊
偏不惡更煩壁上埽莓苔

上巳日同抱琴泛舟鑑湖作七首

錄一

去年秋蹋槐花返與君共住蓬萊館越王城上烏夜啼雨葉
蕭蕭腸欲斷三月三日修禊辰鶯歌花舞天氣新風光如此
不行樂轉眼都非青鬢人

秋懷

懶臥元龍百尺樓如聞宋玉慣悲秋西風白草蜻蜒老暮雨
黃花蛺蝶愁難爲鶴謀田二頃且將奴賣橘千頭破除萬事
無奇策試向糟邱覓醉侯

吳門客興

曉窗驚破夢惺忪滑滑泥香鳥語中花港屐聲纔夜雨酒樓
帘影又東風踏青駿馬惜難得買笑榆錢拋欲空客裏送春
惡懷抱可堪詩弔館娃宮

吳閶絕句

寒食風光潑火前冶坊濱樹盡鞦韆花鈿拾得無人問送與
當壚作酒錢

竹林寺

偶爾遊招隱因之過竹林僧頑無佛相鳥靜得禪心雲外鐘
魚遠澗中花藥深林公鑿石處泉好更重尋

廣陵絕句

煙花南部阿糜迷歌吹空傳盛竹西十日綠楊城郭裏春風
吹凍碧頗瑩

明月珠樓夢小杜烏絲紅裊醉髯秦風流一替成千載眼亂
纏腰跨鶴人

紅葉稍頭繭栗垂揚州風物慰相思尊前怕聽吳娘曲正是
蕭蕭暮雨時

江南草長亂飛鶯江北春歸鷓鴣鳴殘月曉風人酒醒清才
還憶柳耆卿

朝天宮曉起觀薛鍊師步虛

月落烏榜村雞鳴謝尚驛客懷孤不寐起坐空堂寂挑燈待
出日東方猶未白檐鐸微風振庭槐清露滴忽聞履舄聲醮
壇步虛客鶴氅曳褊褊步步凌空碧上清虛皇尊凜不隔咫
尺點頭如受命俯躬豈被責翻然來下壇神仙天上謫兩手
握天符行行書字赤我觀殊恂恍欲讀口已格不如請撫琴

相賞在松石

晚春閒興

喚起頻催覺提壺又勸沽
電光迷豆眼雨點亂花鬚
歲閏添飢日春寒欺老夫
東鄰集羣屐櫻筍飭行廚

送春

蘆芽短短河豚上柳絮斑斑
石首來不中與春垂老別
杜鵑何事苦相催

夏課吳山道院雜興

去年來吳山居處亦不惡
闌楯浸碧水凌虛有高閣
但苦雜沓賓黜擾不可卻
今年獨何處閒房借雲壑
青衣棲息地院後有青
衣洞洞天淨而廓坐對賢聖外
祇有兩白鶴心迹便雙清
未免太寂寞此邦多故人
來者何落落道淺友所棄
空歎交情

薄

朱僊舟所藏宋墨

何年元珪告成功上貢天子藏法宮
剡剡銳上纈衣脫九寸製度雕繪工
上懸日月下山龍藻火粉米逮華蟲
其旁年號蝕小篆強謂北宋誰能從
是時何人官墨務亦勿挂名煩推窮
蒲韶梁杲邠有此精絕不減庭珪翁
試之髹几漆減色光奪夷甫雙清瞳
鹿膠欲脫鞞紋細麝香不散松煙濃
流傳人間八百載磨折多少真英雄
猶然獨完趙璧在緣知情者黃金同
君從何處得此寶親鎖漆匣包裹重
每從晴窗多把玩或遇賞鑒抽詩筒
我來觀之技忽癢欲借斗研磨絲紅飽
飲鼠鬚掃繭紙爲君草書追楊風

新石鼓歌用蘇韻似張石蘭

乾隆庚戌正月春

帝幸太學詢耆叟五更三老授几杖百辟千官肅趨走忽瞻石鼓偶讀之文字缺落時窒口

帝曰元瑞補厥中朕先排句列前後瑞也欽承歸秉燭一夕鬚眉十白九重文亦有馬與車貫串真同魚貫柳豈惟綴殘能補缺直移躔度換星斗鑄之丹墀

帝頷頤記其緣起

帝運肘盡駁迺樵存昌黎猶養嘉禾芟稂莠廷臣誰善大篆書員外實維太史友其於籀也真嫡嗣威鳳將雛靈鵲殼縮出千行非蛇蚓書成無筆不蚪蚪翰林學士如堵牆爭看無論壯與考一時驚服舌上橋誰敢異議口先喉廣搜貞珉鑿差我欲製重器配彝貞工劣先防掘白窠式圓必示擊矇瞍

十章次第勒金石萬古鐫鏡齊岫嶠吾

皇惠儒更有加要使遠近無薄厚一置辟離一熱河歲月亦
各記某某文治長垂詰武昭遠軼周宣古希有後來据舊復
考新博洽誰知貳負杻翳子久踏東華塵車如雞棲馬如狗
因從祭酒課成均幸覩法物此生偶大勝鴻都觀石經讀畢
肅容三稽首幾回贊歎欲摩抄敢效愚蒙聊擊掇靈文祇許
腹記將紙本那容手搨取歸來燈下默傳鈔學淺誤筆多癡
垢剔之正之誦萬遍藏諸行篋慎厥守自愧才非韓韋蘇作
歌安能垂不朽禱皇典麗善作頌漢廷自有王延壽

邵桐南閣老黃葉著書圖

長安秋盡黃葉飛紫薇散仙投紱歸歸家卸裝無長物祇有
千卷書籍隨田園荒蕪三徑窄推宅自賦棠棣詩水西別券

一區宅林蒼幽僻香茶蘿先生入室祭竈罷杜門卻掃車馬
稀橫陳卷帙榻左右牙籤一一親手披就中一編舊所著檢
出重校偏旁疑亥字六身係二首馬形四足尾卽垂丁子左
行已兩背雷回雲云象各宜根柢必歸許慎學疏解或救徐
鉉非況於孔孟實羽翼那數爾雅蟲魚奇邇來俗儒趨淺陋
說文高閣束不窺先生頃在天祿閣講求形聲無餘遺卽從
下直休沐暇猶持著作詢舊耆覃谿學士最博奧相國議論
尤陸離當時兩公極傾倒謂此書乃鼎彝彝卽今林下頗閒
適正好自補箋注爲私諸己有又涉隘盍付梨棗觀劂削後
生小子俾識古傳之千載功無涯而我好古亦入僻欣然借
觀攜一瓶登堂先見行看子凍葉正擁階前籬

宋經畬

字心芝臨海拔貢

題是亦園

我杜柴門居有客來相訪張載邑耆英於我十年長示我
編詩大言成切響委山多高賢君謨尤無兩積學腹便便昂
藏軼塵鞅家有亦是園林垆豁開敞暮看東海雲朝挹西山
爽投轄來佳賓曾鞏沂與李昉芝或珍如璆琳或秀如篠簜
或韻鬪尖叉或繆糾杖杖名篇束筍投嵩華爭企仰屬我續
豐貂效顰慚勉強願作汗漫游徑打椒江漿望望石曲居先
問開徑蔣有山起屢屨有花倒益益結構擬輞川離奇愜心
賞相問賢主人同向蓬萊上

應大成

字展庵臨海諸生善展庵詩鈔

王巖苑序畧壬子歲館三山因得與展庵交時以詩詞

相投贈余覽其諸作蒼澗潏潏渾渾灑灑若大海汪洋

變幻神奇孫乎不可名狀云

白沉

竹樹當溪做煙雲定滿枝看花如讀畫拂石偶題詩山近風
來急林幽日到遲惟餘一簾月夜夜作相知

懷樂安諸友

江山千里故風雨一番新自別官橋柳相思春復春
花塢能消暑移舟入小溪行行無定處多半在橋西

曹開泰

字佩卿號珩圃金華歲貢
著宜弦堂詩鈔十二卷

縣志開泰性安雅不立崖岸工詩古文詞日以詩酒自
娛環堵蕭然有自得之意作詩酒散人歌以見志晚生
講東明書院品高

學邃士論翕然
張作楠跋畧佩卿師少從邑人方一齋淇受舉子業試
輻高等師知其不足傳也悉棄去專肆力於詩古文詞
工行草醉後得句素筆疾

書蛟龍盤擎淋漓滿幅
樓上層日行圃博學好古精於詩自漢魏至元明錄百
十卷尤服膺李杜韓蘇及義山遺山諸公時金郡士氣

朴茂少耽吟者駘圃
力爲提唱風氣一變

卮言

干將可刺鐘補履不如錐騏驥日千里執鼠不如狸物各有
所短亦各有所宜本非百里才士元何崛奇當時諸葛公庶
幾心相知

樊英盜虛聲种放失晚節方其高蹈時斯人恐不出出則平
平耳左右動支詘豈惟殷深源書空常咄咄高臥東山人風
流故第一

酒醴各異氣飲之皆芬芳菽粟亦殊味俱足充飢腸世人尙
苟同一概而相量淺寒自背日焚暝自向陽安能違本性逐
時爲低昂

止酒歌爲邵勿齋作

止酒止酒內撻其心外撻口既不效瀉于滑稽能一石亦不
數參軍解醒須五斗椎碎鸚鵡螺擊破蒲萄缶平生高築糟
邱臺一旦掃除盡烏有亭亭邵勿齋貧似王季友胸中磊塊
消不得乃以酒爲掃愁帚潁川罵坐次公狂世人見之駭且
走近忽痛自懲畏酒如桔杻世事紛紛一芻狗逢人莫說屠
龍手鏤邪剛而折社櫟散而壽鳩以拙而安龜以靈而剖槁
木死灰道可守先生物理參已久示以杜德機便可襲氣母
豈唯狂藥戒腐腸見性明心此其牖春風晴日鶯嘯柳思君
不見頻翹首何意桑苧翁忽遇支離叟我今泥飲仍頽唐自
笑人閒一駢拇爲君作此詩無乃顏有忤君不見屈原醒山
簡醉千古聲名同不朽

挂書牛角圖

李花初盛楊花落阿慶頭頸當誰斫蒲山公子亦英豪讀項
羽傳氣盤薄須陀授首衆心從宇文殄滅軍聲雄是時汾晉
真人起唐公見推事定矣同盟何意反相屠讀書苦學胡爲
乎不作台司作光祿狼子野心工反覆竇融勳業竟無成籍
也誅夷了殘局一錯無從鑄六州當時豈若老騎牛叩角猶
堪效甯戚爲犧兼可悟莊周舊事隋唐如電轉披圖搔首情
無限千古傷心此例多華亭鶴唳東門犬

河梁落照圖

降將不能拌一死馬角烏頭無望矣忽聞故友賦刀鏗把袂
窮荒涕不止攜手河梁落照傾故鄉回首倍魂驚隴西邱墓
何堪問幕北穹廬老此生向令橫草作壯士馬革裹尸報天
子縱不生還如子卿何須曲筆煩遷史十九年餘節毛禿一

漢衣冠一胡服兩人心事已全殊
白日照來明似燭吁嗟乎
送君南浦未云遠折柳灞橋有時返
惟有河梁別恨深後會
無期腸寸斷斜陽黯淡照庭隈
澹澹寒濤潑面來尺幅尙餘
兩行淚北風吹過李陵臺

書九靈山房集後

竄迹登萊遁四明萬方烽火旅魂驚
子真分作吳門卒王蠋
甘心畫邑耕若使從龍誇建豎
何難躍馬到公卿白頭一死
完臣節青史千秋照寸誠

詩比陶韋淡欲秋文兼黃柳力彌遒
壯懷肯以雕蟲畢歷劫
偏欣蠹簡留陵谷變遷紛涕淚
海天波浪入歌謳一編夜雨
挑燈讀腸斷吳游更越游

過方韶卿先生故里

黍離麥秀悲歌客賸水殘山子立身孤竹由來商義士柴桑
不媿晉遺民風騷沿派今誰主生死窮交憶此人故里蕭蕭
容躑躅仙華峯下踏香塵

雜詩

鼓瑟誠絕技齊王乃好等千金學屠龍爲計亦已疏方枘入
圓鑿所在多齟齬我貴物所賤情意何由孚智者矜其智愚
者安其愚衆豔雖燦然視之若泥塗獨芳雖寡諧寶之若隋
珠

元蟬飲零露青蠅逐羶腥野鴟爭腐鼠海鷗宿寒汀族類豈
殊異秉性不可更落寞蓬戶士閉門抱遺經所食惟三韭短
衣不掩形高歌凌白雪響遏浮雲征翩翩輕肥徒塞耳不能
聽

林宗墊角巾一時趨若鶩謝公濁鼻吟世俗爭相慕兩賢自有真詎以形迹故襲貌神乃遺從人先已誤君子貴獨覺千載入寐寤碌碌常效顰壽陵空躡步

手持和氏璧執裾問途人途人亦何知毋乃不自珍識曲有鍾期相馬有方歎目前偶不遇未必常湮淪吾鼎吾自愛吾劔吾自神時命有窮通昧者宜書紳

張貞文詩

并序

貞女義烏人父瑛母傅初孕夢流星繞腹及生園有異竹高數丈因名祥春幼字傅實母族或讒之傅傅別娶父訟於邑令陸陸辨其枉猶判改嫁女恥焉拔刀欲自殺母急止之且曰汝死予二人亦安用生女不得已請終身事父母父母知其不可奪爲營庵曰

靜浪父母沒始居之乾隆五十年十月庵災惟女所
居無恙弟魁光扶歸家家又火咸駭曰此天之所以
表貞女也卒年七十三既卒竹亦枯死

崑岡之壁皎皎不可塵耶谿之銅百鍊而益神古有嬰兒子
畢生依所親會稽三女亦奇絕後世嗣響難其人

一解蔚彼淑

姬扶輿孕秀祥筠之生不先不後許字於傳惟舊婚媾

二解迴

黃轉綠何須臾惹苒疑似爲明珠鼠牙雀角何代無邑令剖

析明其誣乃復依阿首鼠謂爾人盡夫鴛鴦易偶真良圖阿

女聞之淚下霑衣襦

三解

莫邪可斷不可曲烈士可殺不可辱

念此覲顏何面目願屠吾腸剗吾腹引刀自殊苦不速

四解阿

母聞之涕下漣洏汝死則已矣嗟我二人何生爲阿女素仁

孝擲刀前致詞願得長侍父母膝下老死同舖糜

五解石泐金

寒寸心不刊結庵十笏兮跌坐蒲團七十三載兮隻鶴孤鸞

往事幻泡兮月落鐘殘六解 譔譔出出勢何灼風霆軒軒烈燭

作雞園琳宮委殘燼走者救者駭相愕祝融祝融爾來何虐

七解 匪伊其虐實以暴其貞誠梵宇盡灰滅女之所居獨攸甯

再徙再燬惟其恆始知冰心雪操窮塵歷劫昭昭如日星八解

雲黃山清且幽繡川湖波如油巾幗有至行兀然激頽流卓

哉貞女無匹儔九解

游赤松觀限九蟹全韻

塵埃催白頭安得神瀟灑譬彼飫珍羞反欲茹苦蕒清晨邀

同志塵襟期一擺遂為琳宮游探幽攜木枒田淤訝土崩岸

塝愁瓦解初入何崎嶇興發不能罷須與谿水盡陡見蓬廬

矮四壁森蕭疏二仙儼模楷卻念典午時幻迹驚愚駭誰令

石點頭纍纍盡奔駭或如挂角羚或比觸邪獬信哉九轉成
紅鑪點精錯有爲本無爲不解似可解我上百尺梯一步目
一駭意欲叢篁中久住學張廌丹邱尙可尋遺世如敝屣迴
頭倏悵望萬變一黃嬾武陵巖壑封天台雲樹夥且借故人
歸共擘霜臍蟹縱飲築糟邱高歌凌渤澥試看風與月豈用
一錢買

可園雜歌

前年我在坦溪西今年我在坦谿東谿東谿西亦何擇雪泥
留爪隨飛鴻春風春雨一番足谿光搖蕩千竿竹方塘微波
亦已綠

東橋橋頭清且寒白石齒齒雲漫漫嗁鳥一聲下喬木報我
庭畔花初殘花殘花開風光好莫把落英持帚埽高臥花茵

春未老

昔我一峯

諱執中

灑落者風流兀似褚季野廿年種樹自長吟

我亦時來親風雅題襟往事盡成塵人琴俯仰堪酸辛松蒼

桂碧爲誰春

苜蓿一盤甑一席白雲空濛煙樹碧但得殘編日點竄南面

百城詎足易憑闌倚磴鬢蕭蕭問我何事形神勞撚髭長日

方推敲

智者寺雙鐵蕉歌

何年純鉤湛盧入土土花裂精氣騰上萌芽出一年不得一
寸長寸寸擎空拗勁鐵初疑虬與龍曼殊攜來幻作雙扶筇
又疑誌公一枝錫肇開兩枝勢相敵昔在大同天監年大師
慧約結廬遁迹於此山得非其時便種此灌以澡瓶之水高

參天隱侯彈文彈不去孝標過此應流連不然蜻蜒之樹何
以久久不復覩獨此擁腫缺齧終古摩雲烟鳳尾何脩脩形
色奇而古一如僵立一如僕天寒野陰戰風雨怪爾有葉不
可以學書有苞不可供蒲菹殘鐘清磬閱朝暮綠苔紫蘚交
模糊鐵蕉鐵蕉我今酌汝一盃酒汝不見寺前千株老松竟

何有

寺多古松今
斬伐殆盡

姜典三

字瀛會號清
亭江山歲貢

劉履芬旅窗懷舊詩山鄉耆舊溯清亭骨幹嶮巖筆有
靈何日響泉詩並見休教傳播只零星自注同里楊響
泉奏瑟姜清亭典三兩先生皆乾隆詩人響泉先生詩
嘗有其全稿經庚辛之亂失去清亭先生詩只存四首
之
丞錄

富陽縣

澤國千帆集秋風萬馬驕半空橫虎穴一縣跨山腰木落鐘

聲度天空雁陣遙生憐謝康樂淚滴浙江潮

錢塘江

片席凌晨渡寒江淨不流地平疑到海山細欲銜樓霸業東
西岸菱歌島嶼秋誰令胥種魄迸作怒濤浮

釣臺

人傑悲功狗客星成冥鴻兩賢千載迹一髮亂流中論舊足
加腹封侯罪掩功淮陰今夜月不共此山同

吳企奭

字棠蔭清安歲貢官嶧縣訓導著雕龍齋稿

向鄭松巢乞蟹戲介以詩

昔君作蟹詩歷歷疏所記典故悉搜羅隸事可云備我欲學
步吟苦不留餘地譬如讀呂覽無能易一字滌筆手自鈔珍
重藏篋笥時或出披吟口角有餘味想君於此物性情有獨

至揮毫一杼寫乃爾極工緻今者水落灘蟾蚌已輸穗遙想
杯盤間胥奴爭入侍兩螯砍霜雪八跪森芒刺新黃孽乍開
玉液膏流膩嗟予拙生涯多爲口腹累饕若坡公餽渴似相
如嗜一詩兩尖團頗饒古人致良工再帶糟入甕令骨醉握
管已垂涎何況親嘗試盍分令公廚歸向細君遺餘甘及豚
兒尊前遙拜賜并授君蟹詩解摘俾多識庶免螿螟誤不落
君謨戲但恐佳節過區區不予昇願遣急足奚速向雲峯寄

高

溥

字坤涵號博泉永嘉歲貢官浦江訓導著柏園詩藁凌雲社菊影酬唱

東甌軼事隨筆博泉列菊置燈懸紙取影隨意位置其
疏密濃淡有無變態不可思議因邀同人賞影唱和成
吟一時知名士如程養齋浩趙權松貽瑄趙秀山廷森
胡小山森桂周竹仙嵩觀邵月波南金高楚帆雲董節
夫中模張印浦大川朱伯華汝南俱與其會
名其詩曰凌雲社菊影酬唱邵月波爲之序

題紅夷風土圖

寨城崖屋自西東入眼新奇繪土風一片蠻烟瀛海上萬家
番部版圖中蹋歌有隊文身俗鬪捷如飛儋耳雄番種有入儋耳其一
也
欲識夷民歸化遠鴻文纂處譯來同

童中模

字初號節夫永嘉歲貢

縣志中模性好學諸子百家靡不通曉尤精句股王通術家貧恆辟穀旬餘無所苦好游山不備芻糧久而忘返人咸以仙目之巡道李公鑿宣延主東山書院講席嘉慶壬戌夏大旱鑿宣問計於中模乃於六月九日設壇書院禱三日日十三日午時當雨及期果大雷雨四野霑足酬以金不受時處州亦大旱知府王績著麗水合張吉安禮聘往禱中模閉門三日日未申之時大雨滂沱雷電馳莫道天公容易測桑林且費七年思至七月初二未日未時初三申日申時皆驗酬以金亦不受

題朱西宇小影

天地如太倉生人只一粟黍珠何圓湛知止便自足烏兔無
停輪松竹不改綠舉杯嗤世事一一成棋局呼童頻進酒前

杯後杯續嘯傲巖壑閒誰復驚寵辱披圖一想像非仙亦非俗
醉聖太顛狂釀王猶逞欲依稀陶靖節三徑留舊錄

呂

鴻字奠安縉雲貢生著

縣志鴻學問純粹詩才敏捷晚節益自勵知縣劉廷賜書德馨二字旌其廬

宿棲真寺

已從巖門遊遂到棲真宿挈伴祇兩三偕童恆五六逸興逐
雲霞幽情散花竹老僧愛高客喜我來不速禪房羅酒漿香
廚給湯沐湯沐一何清酒漿一何馥夜氣入空山萬緣齊懾
伏一覺夢邯鄲朝炊黃粱熟

兩浙輶軒續錄卷十八